



擷芳集卷之十六目錄

才媛詩

古歙初菴汪啟淑選

俞桂 三首

楊夢花 一首

張昊 五首

孟坤元 一首

陸氏 二首

柴貞儀 六首

柴靜儀 十三首

夏沚 二首

俞韞玉 五首

張氏 一首

朱德容 七首

丁氏 一首

徐昭華 十七首

鄭氏 二首

陶文柔 六首

柯氏 二首

符受徵 三首



擷芳集卷之十六

古歛訥菴汪啟淑選

俞桂

字瓊英浙江仁和縣人

毛先舒閱俞瓊英集詩宋玉真愁客江淹本恨人何當誦遺稿霜鬢又添新

江南古意

江南三月花柳香青春欲徂白日長杏梁陰陰燕新乳
頽頽差池弄輕羽美人午起自結束曳鬢垂髮手如玉
春草滿園蝴蝶飛金鞍少年他日歸

無題擬李義山

纔唱驪歌日漸曛牽裳官道淚紛紛紅英陌上花無主
錦翼雲中雁斷羣玉鏡幾時還照影金爐從此罷燒薰
聞知天上無離別願得相攜駐白雲

中秋

玉鏡澄清漢金波蕩碧流桂枝應欲謝空倚最高樓

陳維崧婦人集仁和俞瓊英名桂詩文纔一十六
篇才思頗清綺遇合抑塞年二十而夭其擬義山
無題詩江南古意
中秋詩等云云

楊夢花

江蘇武進縣人

落梅和韻

空閨何忍問花殘為和新聲獨倚欄香夢可能留玉笛
芳魂早已落詩壇一簾疎雨回春信數點輕烟籠曉寒
索笑也知成往事尚餘瘦影與誰看

張昊

字槎雲浙江錢塘縣人順治庚子舉人張壇之
女也適同邑胡生大滌二十五歲卒著有趨庭
咏在室所作琴樓合稿與胡生唱和者

錢塘縣志張昊字槎雲錢塘孝廉壇女也昊生
而孝且慧喜為詩七歲即有白馬嘶風秋草寒
之句壇益愛之歸同邑吳文漪吳詩清淒蒼遠
無閨閣粉澤氣尤喜讀孝經壯志慕學仙已壇
沒京邸昊哀痛甚未幾亦卒
年二十五有槎雲遺稿行世

張振孫槎雲傳槎雲姓張氏杭州人名吳槎雲其字也世居城之西偏祖蔚然官長溪令學者稱青林先生父義壇順治庚子孝廉卜居于毛氏園在城北郭外竹樹方池迴塘植芙蓉橘柚桑柘之屬吳樂焉性喜讀書覽典籍輒知文理且以教其二妹花晨月夕賦詩唱和然不肯示人從兄綱孫見吳一絕句其結句云殘風殘雪斷橋邊悄然歎曰是妹必以詩傳但福薄耳果如其言年十九歸胡遵仁子大濬勸其力學從同里毛先舒為師諸匡鼎洪昇為友以文章行名於時卒年二十有五所著有趨庭咏施閨章琴樓合稿序錢塘胡子文猗與其婦張氏槎雲並能詩槎雲年二十五死胡子神傷追刻其詩儷以已作是為琴樓合稿論者皆悲槎雲以才天余觀近代吳越間女士稱詩不乏新聲麗製律之內則所垂班姬所誠或無取焉且夫男女之際難言之盤中詩好不聞伯玉和歌織錦詞工未見連波作答女之才多不能必其夫至如夫婦皆才而卓氏有白頭之吟徐淑有

人遐之歎蓋兩美難合薄命寡歡自古恨之若胡子之與槎雲可謂美合而相得無恨者矣槎雲乃遂早死余既惜其才又多其能修婦德聞父病京邸刺血禱詞已而訃至哀慟得疾逾年卒今讀其思歸哭父墓諸作盡然有足傷者昔歐陽公與謝進士景山交因為其女弟希孟序詩今槎雲故步青之女祖望之女弟也余嘗交二君湖上而胡子又從吾友毛君稚黃遊以是不能辭然吾聞胡子繼室陸氏星浮亦喜詩工刺繡文未幾復夭何胡子之連有才配而皆溘以盡也

李式玉為閨秀張旻入誌啟錢塘張旻槎雲者出自孝廉姓來天上名同博望身犯斗邊幼工柳絮之才嫁作醜桃之句鮑令暉之學難乎為兄蔡中郎之書傳于其女人非秦掾空託怨于寶釵情異班姬常寄愁于紈扇登大雷之岸曾見往還穿七夕之針時逢贈答馬融見而伏讀皇甫令其裁書所著遺編哀然行世琉璃作匣不足酬其鮮妍芰荷為裳或可方茲雅潔乃秦

地之臺猶在遠爾乘雲江臯之佩徒存忽焉奔
月不聞柳詠誰續班書方今搜閨閣之賢葺郡
國之誌因思春秋之筆猶錄叔姬江漢之思采
及遊女苟循斯例於邑有光使河北花機常騰
衛字扶風錦軸流誦蘇篇則曹氏東征獨擅
大家之號將茂先女史空慚博物之名矣

秋夜同玉霄朝衣二女弟玩月

蕭颯梧桐下寒風拂樹枝蟲鳴聲寂歷月落影參差景
色仍無恙淒其異舊時聊同諸女弟握手使人悲

秋晚

極目危樓上天涯晚望中雲憑荒野濶日落大江空露
冷蟲初響風寒葉正紅興來無俗慮明月在疎桐

觀潮

風急秋江晚潮聲落照前遠疑千練白高並一山懸孝
感曹娥志忠留伍相賢千秋遺恨在故令怒濤傳

和文漪登六和塔

古塔凌霄古鶴棲憑高俯仰萬峰低遙帆流水來何極
野樹江雲望欲迷漠漠遠天滄海合悠悠落日晚山齊
登臨此際渾忘返遙聽城頭烏夜啼

斷橋殘雪

梅花初發早春天愛採花來緩步還最是孤山烟雨後
殘風殘雪斷橋邊

孟坤元

掛芳集 卷十一
字順成甘肅清水縣人適狄道州吏目靖江何
學海隨官四方足跡幾半天下著有紀遊讀史
諸集

滕王閣

憑高直瞰大江浮弔古猶登帝子樓千載文章傳絕調
一時雅燕盡名流落霞孤鶩齊飛晚遠水長天一色秋
誰道閨中胸次窄也將詩筆紀清遊

陸氏

江蘇華亭縣人陸亮直女兄適張某著有機杼
餘音集

燕雛行

并序

世傳燕子負親子自小少知孝友至于適人之
後家貧路遠不能少遂區區之願每自慚自怨
傷今感昔無所控告作燕雛行
以自況辭雖至陋意實難堪

初生未知還未識飽却雙親口銜食不念雙親之苦辛
兄弟同巢心悅懌羽翼新齊知覺初隨親上下音相和
翩翩堪樂雙親意自信無慙反哺鳥那知一旦苦匆匆
各自飛飛西復東或巢王謝雕梁上或入尋常茅舍中
蓼蓼莪生方可愛須臾一變作蒿蓬念此中腸渾斷絕
支離淪落渝情節天地山川尚可移人生斯耻死難雪

春景

掛芳集 卷一
日煖天桃花欲然依依柳色翠和烟高樓遙憶當牕女
何處春光不可憐

柴貞儀

字如光浙江錢塘縣人舉人柴雲倩之長女也

適黃介眉

九日偕諸女伴遊湖上

九日悲涼候今朝暖獨偏殷勤共酒盞彷彿對春筵霜
意纔催柳晴光尚媚蓮黃花遲不發應解惜韶年

遊雲護菴

欹側茅菴霧靄侵柴門曲徑費幽尋千林繞屋藏山曲

衆鳥歸巢愛竹深嶺月夜窺華鬢相松風幻作海潮音
禪關不似仙源隔莫遣桃花護洞陰

題畫

剝喙渾無韻翱翔若有姿依依碧叢裏却傍繡窗窺

羅巾

拭去盈盈淚攜來馥馥香慙慙纏素手縷縷似愁腸

陳維崧婦人集柴貞儀字如杭州人也能詩其
咏羅巾絕句云云亦絕有思致

題臥遊障子

一幅江山翠萬盤怪來雲氣撲闌干夢回不識自何處
蟾月當峯枕簟寒

題烟江疊障圖

誰將素練染霜毫幻作空濛萬里濤一片征帆何處落
千峯雨色暗江皋

圖繪寶鑑柴貞儀字如光仁和人茂才黃介眉室
點染花卉以及草蟲翎毛無不超神入室詩亦蘇
蕙之流錄一
其題畫云云

柴靜儀

字季嫺雲倩次女也適同邑沈漢嘉善鼓琴著
有凝香室詩鈔北堂詩草

國朝詩別裁集柴靜儀詩本乎性情之貞發乎
學術之正韻語時帶箴銘不可于風雲月露中
求也令子方
舟能承母教

小粉場雜識柴季嫺孺人詩深思古韻菁藻聯
絡絕無閨閣粉黛之氣及讀丁葑園序才知孺
人懷抱之
蕭逸也

燕燕篇

燕燕何差池相顧戀儔侶春日方載陽呢喃如學語結
巢在君家本謂獲安處啣泥而哺子雛成大辛苦童子
亦何知探穴敢予侮不惜口卒瘡傷哉無牖戶幕上與
梁間何者為樂土

天天樹曲悼朱靜子

天天一奇樹春風忽吹折無實亦無華愁與啼鵲別香
冷鬱金堂微波似淚妝三星不成艷月出可憐光

琴詩

有引

予年十一父雲倩公賜一琴名老龍吟教以按
 指揮弦之法早暮學習不敢忘之稍長手錄琴
 譜數帙父為作琴譜序一篇訓辭備至迄今誦
 之不勝手澤之感因全載序文于此而繫之詩
 序曰古樂之能調和性情者莫善于琴不獨賢
 人高士足以寄其恬曠之思即閨壺者流亦在
 所不廢故余教汝學琴者誠以幽閒貞靜之音
 有取乎淑懿其德也女訓有曰舅姑命之鼓琴
 必正坐操琴而奏曲問曲名則舍琴起對小曲
 五終大曲三終是樂之中又有禮存焉夫彈琴
 必整襟以凝神端視以定氣和平之心與和平
 之聲交相感發即可使天地消沴致和而况于
 修身宜家乎昔蔡中郎善識焦桐而其女亦能
 辨絕弦之數雖百羅坎壤猶憶父書余才不逮
 伯喈亦勿願爾蔡琰惟觀汝手錄茲譜意甚嘉
 美能于修身宜家消沴致和之道益三復余語
 庶幾哉無虛乎
 余教汝之心

朗月當窗牖淒風正徐來顧視壁上琴慷慨有餘哀我
 父昔知音貽我桐梓材幽蘭與白雪朝朝奏庭幃高堂
 莞爾笑謂我無暫離消沴召和氣閨閣固其宜白鵠翔
 寥廓神龍為徘徊聲音與天通應感非所期一日三摩
 挈愛此軫與徽金相而玉質乃為女士師

長信宮

玉臺妝罷無人見傷心空自悲團扇秋草偏生長信宮
 春風只在昭陽殿殿裏君王酒半醺嬌歌雅舞爭紛紛
 三千錦帳飄香麝十二長裙散彩雲眾中別有人如玉
 新妝艷艷嬌紅燭不許寒烏帶月啼恐驚春燕啣花宿

誰憐長夜夢難成
忽度流螢似有情
片月高高挂天漢
千秋應照妾心明

清溪叔璵姊小影屬題漫成長句

有姊有姊年半百
井臼親操不辭力
西湖片月清溪雲
欲往從之無羽翼
却憶當年尚小玉
面雲鬟何窈窕
折將紅杏倚雕闌
釣得銀鱗出芳沼
猶喜二親頭未白
彩袖雙雙侍朝夕
自從于歸三十秋
經年一面翻如客
如今一面亦難得
見畫宛如見顏色
玉釵斜鞞儼妝成
坐覺香風四壁生
一雙美目剪秋水
往往顧我殊有情
簾外花開淑景移
羨君言笑好容儀
堂上有姑房有妾

春風何處不相宜
昨夜烏啼霜滿野
迴首慈闈淚盈把
人皆集苑不集枯
誰復念我窮途者
君今與我最相親
惆悵扁舟隔水濱
陌上櫻桃幾度熟
關頭楊柳幾回新
柳暗花明春似酒
爲君腸斷君知否
願作蒹葭倚玉人
與君畫裏長攜手

悼顧重楣

望望人何處
寒山起暮雲
清霜凋秀木
白日冷孤墳
佳句紛成誦
遺音杳不聞
最憐芳草色
獨似舊羅裙

過願圃同馮又令錢雲儀顧啟姬林亞清作

雕闌畫閣倚層空
翠樹紅霞入望中
照水雙雙看舞鶴

銜蘆一一數歸鴻
簾前夜映梅花月
筆底春生柳絮風
相過名園誇勝景
清尊喜與玉人同

戲答林亞清

羅幃不倦坐焚香
靜對殘春欲斷腸
憐我病餘都罷繡
知君愁裏不成妝
牡丹著雨還如泣
柳絮隨風底事忙
倘步池塘閒遣興
莫因幽恨打鴛鴦

題自畫

香閣閒無事
丹青聊自娛
移時眉黛色
寫出遠山圖

哭母

四首

白雲隱隱隔秋山
望裏松楸不可攀
一去夜臺何日返

畫圖彷彿覩慈顏

靜對寒燈百感生
總緯深掩夢難成
最憐垂死秋風夜
含淚猶牽兒女情

金飈玉露總消魂
衫袖生寒積淚痕
三十年來啣罔極
可憐無日報親恩

古木風悲咽暮蟬
傷心酌酒墓門邊
金燈夜夜光如漆
恨不相隨到九泉

夏 泚

字湘友江蘇無錫縣人
薛旣央之繼室也與吳
菴仙爲中表戚著有詩集

小粉場雜識無錫閩秀夏湘友名泚與吳琪爲
中表姊妹琪五十初度湘友手製水田衣畫便
面以寄之規勸毋久浪遊江北吳果失意悵忿
以歸後吳率湘友經紀其後事有女俠風惜其
所著詩稿失傳

懷吳葑仙

癖耽翰墨費吟哦欲寄愁心到薜蘿江外故人青眼在
山中女伴素書多天涯燈火誰同調歲暮風霜獨抱疴
彈指流光容易擲家園歸夢近如何

衲衣寄吳葑仙

當年羅綺艷爲裳此日將雲補衲忙針線不嫌燈火暗
剪刀曾近佛鑪香常將挂體蒲團相疊入空囊雲水裝

轉眼秋風黃葉裏披衣耐得五更霜

俞韞玉

字隱情浙江海寧州人適錢塘徐吳昇著有鹿

門草

古別離

郎留未敢信郎去苦離別泪下如湧泉涓涓不能絕

泥美人

香泥點綴現全身體態幽閒掌上人翠袖翩遷嬌欲舞
朱唇巧笑淡含春蛾眉京兆難重畫粉面何郎休再勻
更喜芳情常自歛羞隨遊女步花塵

雨霽

雲散烟如洗山空接遠天水聲猶未歇月出見嬋娟

梅

一枝清瘦自精神淡蕩烟村別有真傲骨孤芳塵不染
笑他紅紫艷三春

玉樓春

品超萬卉是花王金谷何須鬪艷妝絲繡楊妃嬌欲醉
沉香亭畔試羅裳

張氏

江蘇揚州人所適未詳

題店中壁

自序乙酉六月一日遇難寶林庄徬徨無地洒
淚而書以為異日訪尋之具廣陵十七歲女子
張氏淚筆書于
方順橋店中

凌波卸却換宮鞋女作男妝實可嗟扶上高樓愁不穩
泪痕多似馬蹄沙

陳其年婦人集賡明弟名玉璣自北歸以郵亭女
子一詩示予予為憮然其詩云云蓋流人羈子過
之繫
念矣

朱德容

字趙璧浙江會稽縣人太師朱公燮元之孫女
也適祁忠繁次子奕禧

送別黃皆令

青青楊柳枝飄搖大道傍大道多悲風遊子瞻故鄉執
杯送行客淚下沾衣裳憶昔弭遠棹明月浮景光盃觴
極良宴歌舞開華堂好鳥得其侶舉翼雙翱翔膠漆兩
不解金石安可方分袂起倉猝永夜生悲傷吳山何渺
渺越水何茫茫芙蓉憑秋波熠燿吐幽香採以奉所思
所思難可忘

遊山

寂寞佳山水樓臺薜荔間野橋分竹路高樹繞谿灣徑
曲留琴語杯寬破客顏夕陽鐘磬外猶有暮雲閒

上巳

桃花秋水湧春衣舊日蘭亭到亦稀斷岸羽觴晴日暖
遠山橫笛暮雲飛沙棠舟落江鷗起玳瑁梁空澗燕歸
尚有采蘋思未足不堪月色上羅幃

採蓮曲

綠葉羅裙一色裁芙蓉映水兩邊開欲將新曲頻頻唱
恐有鴛鴦飛入來

咏虞姬

歌罷傷心淚幾行江山旋逐楚聲亡貞心甘向秋霜劍
不欲含情學漢妝

愁雨

烟雨重重宿鳥驚惜花愁聽落花聲只今閨閣應寥寂
還憶亭臺芳草生

寄修媽

莫捲珠簾對碧山山邊孤鳥日飛還如何百里相思路
惟有隨人月影閒

句

曼華不落雁書稀

西河詩話閨秀朱趙璧憶夫祁六戍塞詩有句云
云考盛京風土記盛京饒桃柳梨杏芍藥雞冠菊
蜀葵蓼茉莉番雞冠曼華即茉莉番名
占候云紫茉莉因風吹落雁皆南飛

丁氏

江蘇清河縣人潘尊賁妻也

舟泊蕪城

流離一孤舟魂黯蕪城路不見折瓊花惟聞悲玉樹

冒丹書婦人集補清河丁氏潘尊賁妻也幼有劉
三娘之目能詩歌其舟泊蕪城云云二十字中乃
使人居
然悽惘

徐昭華

字伊璧浙江上虞縣人徐仲山之女也適諸暨

駱加采毛西河先生女弟子著有徐都講詩一

卷附刻西河集中

柳亭詩話吾越閩秀以詩鳴者湘君雲衣玉映後則徐都講為最都講者名昭華字伊璧駱君加采之室也倡隨之暇雅好蔣蘭因自號蘭癡有素蘭詩四首余嘗和之而西河集中失載毛西河觀昭華畫障詩吾郡閩房秀昭華迥出塵書傳王逸少畫類管夫人紫水和泥染青山帶露皺蝶衣聯繡褶花片滴朱唇閣上烟雲曉階前草木春祇愁頻對鏡圖作洛川神

桃葉渡歌

可憐桃葉渡落日行人暮雙槳打清波春風緩送桃葉過只今桃葉渡頭稀艇子江頭歸不歸

明妃怨

一別深宮出塞垣黃沙陣陣撲金鞍于闐不見花堪採隴水由來淚未乾寒風萬里吹浙瀝欲掃蛾眉恨無力

環珮空教入夢魂臙脂久已無顏色試聽琵琶絃上聲分明都是別離情漢宮窈窕何所見惟有塞垣寒月明冰連野窖烏啼歇月照長城馬嘶絕更闌蘆管暗吹來不落梅花落寒雪故苑春花陸續生春風吹不到龍庭燕山萬里黃雲暗惟有明妃墓草青

因探親吳門同虞夫人遊虎邱

閶門日出晴鴉噪雨槩閒尋武邱道宿霧猶含堤上花流雲已渡波間藻紅欄上下傍水行畫船歌吹來傾城迴帆不盡摻搥意轉慢時聞過曲聲斜峙山橋甫能住香車早趁山塘去滿街梔子未開花幾樹垂楊自飛絮

到門知是梵王宮
 臺榭連雲曲徑通
 棕棚覆葉沾茶碧
 漆柱遮油賣杏紅
 我尋生公舊法席
 褰裙一上生公石
 龍剗絕壁尚留池
 虎去中林杳無跡
 登山四望更無山
 但見山藏古寺間
 繞地松楸看去密
 空庭塔影落來圓
 修廊詰曲幾回度
 又聽歸鴉噪前路
 夕陽一片寺門邊
 不識真娘在何處

贈尼御符次西河夫子韻

前身本虛照開口
 卽彌陀乞食施山鳥
 裝香在海螺鄉
 程雲外近別思
 晚來多試看千江月
 徐徐出綠波
 幾欲還慈室無緣
 歎跋陀毫分眉際
 彩掌合指頭螺贈

拂留獅尾繙經度
 貝多龍宮有神女
 何處不凌波

西河詩話子寓大善寺吳尼御符爲天童曉公付
 法以掃塔過謁子謂女僧不當與酬酢遣門人徐
 昭華報之瀕行尼出摺扇乞詩不得已書一律去
 不信纔觀此幡然去普陀傳衣真是錦剪髮尚如
 螺貝葉箱中薄蓮花水面多阿潘方學道相待洛
 橋波次日越中女士合餞于國門見摺扇齊聲索
 昭華和詩蓋借此相難也昭華
 連和二首其一云云其二云云

彩毫怨

榆落薊門秋
 征人出塞遊
 新鴻迴絕幕
 孤月照空樓
 拂紙千行淚
 揮毫萬里愁
 緘題猶未竟
 重拆問封侯

送尼

芙蓉曲岸散紅霞
 送客江邊疎柳斜
 蘭槳行時飛化雨

錦茵鋪處布金沙乘杯欲度吳閶水拂塵曾開鑑曲花
一自水田相顧去何年重把綠袈裟

西河詩話又送尼詩云云此等純似唐詩若落句則非白傅不能矣子門工詩者推盛唐王錫然俱不及昭華以稍解唐人法外意也舊所寄政詩嘗受仲山意輒留稿另作一帙今散漫不能矣因錄數詩于此為亡友

中郎存一綫云
遊靈隱寺叅具德尊塔院

十年曾憶舊龍宮為侍慈親到此中
蒼荀香飛千里月芙蓉漏滴五更風
烟籠古樹迴青雀水滿前池散毒龍
桂子已從明月落蓮花還向繡幢紅
迎將車馬仙壇合到處笙簫梵唄通
午霧未開迷寶筏暮潮初上動金鐘

飛來靈鷲依然在何處禪關覓遠公

題畫蝶

蛺蝶翻飛去翩躚綵筆中雖然圖畫裏渾似覓花叢

西河詩話昭華又請試會昭華畫蝶工甚遂命題畫蝶五絕限東韻昭華立成云云誦之一座驚歎予喜為和詩云滕王有遺譜描之深閨中羞殺東園蝶翩翩滿綠叢蓋言羞時輩也時予又為二絕書傳是齋誌歡幸之意一云四十年來老自驚新收門下女康成不知書面縑花好試看塔前帶草生又云深堂樺燭照脚卮隔幔吟成畫蝶詩不是小鬟頻乞試那知閨閣有陳思其云小鬟則指奴將命者後張遠首和畫蝶詩韻一詩傳和竟至盈卷子另有四首不和韻亦錄卷末

塞上曲

十首選四

朔風吹雪滿刀鏃萬里從戎何日還誰念沙場征戰苦

將軍今又度陰山
長雲衰草雁行平
沙磧征人向月明
思婦不知秋夜冷
寒衣還未寄邊城

蒲桃宮錦紫驂駟
走馬沙場日未休
籥箎聲傳明月夜
琵琶絃斷玉關秋

曠騎三千出漢關
雕戈十萬臥燕山
月明近塞頻驅馬
尚有將軍夜獵還

陳迦陵錄此詩時語人口聞中人作雄詞墮小說家女俠習氣獨昭華塞上曲沉情超筆漢世樂章忘其為唐山作也吳寶崖亦競稱數詩為龍標絕調

青未閣十景 選三

博山鑪暖炷沉檀
捲幔青峯郭外攢
百尺銀牆遮不往

尚留螺髻與人看

郭外青山

螭鳳燈燃待月來
鴛鴦幙捲向池開
只憐波底珠盤影

渾似樓頭玉鏡臺

碧池朗月

翠竹臨池碧水寒
輕烟散入玉欄干
不知昨夜黃梅雨

却道春深露未乾

新篁烟雨

西湖竹枝詞

赤石磯邊湖就姑
長將綠髮石邊梳
妝成只怪西施巧
那便花花似此湖

此詩本集失載吳寶崖從陸蓋思選本中得之其竹枝共選四百首而以此冠卷徐野君每謂是詩

只拈西湖二字便出人一地又謂古詩花
花相對俚語花花世界二字誰敢拈出
句

青葱出瓦根俱豁碧柳當窗影漸疎捲榻已無新註帖
開箱惟有舊藏書

山長似向空欄斷月隙還隨小榻圓有女媧無班氏筆
遺書萬卷續何年

西湖詩話徐昭華多哭父詩嘗有登青未閣檢父
遺帙七律中四句云云又有一首後四句云云

鄭氏

安徽太平縣人鄭淑聖之女也

寄夫

北雁南來愁欲往東流西去繫人思一秋橘綠橙黃日

幾度天涯夢裏時

君在東兮妾在西妾念君兮君不知著草問殘三月信

燈花剔盡五更時

夔齋詩話太平縣陳淑聖妻鄭氏能詩有才辨其
初蓋鍊工女鄰有老學究授館女喜聞讀書聲遂
往受學及將笄通曉書籍嘗與其夫論詩文夫不
能答詬曰鄭聲淫鄭應聲曰陳絕糧陳謂奈何截
一字鄭曰卿試于四書中別覓出成語我當輸卿
先君子在廣陵見其寄夫詩云云作行草書有林
下風味先君子送陳歸里云綺窗應有句把酒與
君論蓋謂是也其手評杜詩一册子兒時嘗見之
後為友人攫去

陶文柔

江蘇青浦縣人天台學博陶冰修女也適顧榆
訓導葉永年著有白雲樓詩草不戒于火故失
傳予從其孫進士葉承處得燼餘數篇

秋日東歸夜泊

玉露傍江浮歸帆何處洲人疑湘水夜月照故鄉秋短
燭消殘夢清樽破旅愁別離難自主淚對白雲流

佛手柑

合掌蓮臺畔纖枝染額黃禪心叅妙諦佛日護含芳微
暈金盤色疑分玉液香文殊應解悟撒手萬緣忘

九日思親

秋容澹若烟雨氣濃于酒倚樹泣思親親亦思兒否

詠菊

不向春風鬪衆芳含英獨自傲秋霜錦江多少芙蓉艷
何似東籬淺淡妝

春夜嘲女伴

月明風細夜窗虛不捲珠簾春恨餘咫尺天涯渾是別
年年花信悵離居

春日偶見蕙娘遺畫感悼

月暝花零思渺然重看遺畫不勝憐柳綿吹散朝雲斷
愁向春風聽杜鵑

柯氏

字錦機浙江青田縣人也

送夫應試

劍匣書囊自檢詳冬裘夏葛賦行裝西風忽送來朝別
明月休沉此夜光見說試文容易作須知客感最難防
莫誇司馬題橋柱富貴何如守故鄉

調郎

午夜剔銀燈蘭房私事急薰蕕郎不知故故儂儂立

句

合線煩君申食指拾釵為我屈儒躬

焚香合爰檀郎拜一幅盤陀水月身

隨園詩話青田才女柯錦機有宣文夫人之風絳
幃問字者數十人同鄉韓太守錫昨猶及見之誦
其送夫應試云云調郎云云又合線煩君
申食指拾釵為我屈儒躬自題小像云

符受徵

江蘇縣人適金某著有百果詩百花詩

汪份百果詩序畧金子颺天以其賢尊受徵氏
百花百果詩請余為序時余方欲西走蘭州治
行肉粹遂携其詩就道於是山由豫入關抵蘭州
當窮陰互寒之時因念家鄉山茶臘梅雪花水
仙方爭妍競秀茲則萬卉皆枯惟見荒山雪滿
又念家鄉黃橙金橘香緣佛手之屬清香撲人
邊地僻遠無由得致迎風忍凍獨立庭前秋然
不能自釋因急取所攜受徵氏詩讀之愛其描
寫物態窮極巧妙恍若芬芳徐來不自知其身
之寓居苦寒絕塞執卷自娛不能去手會有以

哈密瓜相餉者是瓜產古伊吾地去京師萬里
 歲貢尚方承恩稱賞號為果中第一前古
 蓋未聞也惜受徵氏未及見而啖之以發其妙
 思麗句則又為之忽忽然若有所失乃投瓜而
 起復取受徵氏全詩細玩其賦之旨而即譏
 述是說叙之於前以補集中所咏遺缺將歸而
 持示颺天以俱談論而塞其見請之意抑余今
 者馬首即去蘭東向饑驅乞米陸走水浮飄飄
 難定約計歸期在來秋桂花詩以與花相酬接夫
 香徑中朗誦受徵氏桂花詩以自解與對此花
 不見其物而讀咏是物之詩為起不同而足以
 而讀咏花者之詩以賞之其為起不同而足以
 自怡則一也颺天若來謁余談論及此當
 必更增歡笑遂復藏其詩篋中以埃之

烏梅

莫訝途窮面目黧無邊功用漸張施回酸觸鋏翻加白
 粉骨調飴盡涅緇幣帛未鮮需佐染腹心不豫籍攻醫

朶頤輾轉疑羊棗至孝應無下咽時

柿餅

不待沉酣早卸裳霞光內歛外凝霜飴飴調粉爭投契

橘柚充筵訝變粧佳處豈容鮮獨占壽多莫怪久堪嘗

柿為佳實 又多壽 朝來有客清談勝玉屑霏霏掩映香

白果

隨他堅白易緇磷小玉偏能固本真卸却黃袍心似雪
 披將素甲色如銀敢云碌碌成何事自爾硜硜絕點塵
 寄語守身勤取法滌除舊染漫逡巡

水曹清暇錄吳門友人知予選國朝闈秀詩頃以康熙時人符受徵百果詩刻本見寄只家武曹

一序惟稱金子颺天以其賢尊受徵氏詩乞序而不詳載所適及平生事畧然詩頗佳其咏白果詩寓規勸意尤可取漫錄於此其詩云云

擷芳集卷之十七目錄

才媛詩

古歙訶菴汪啟淑選

文星 二首

劉淑慧 八首

林氏 二首

林氏 四首

張孫儼 一首

董氏 二首

朱柔則 四首

蕭氏 八首

陸令和 一首

馮氏 一首

商婉人 一首

夏氏 一首

金如式 二首

婁巽 三首

張淑貞 三首

周巽 六首

顧可貞 四首

姜氏 一首

周僖齡 四首

郭嫵 二首

華蓮修 二首

吳氏 一首

杜小英 十首

葉氏 三首

劉淑秀 二首

程氏 二首

張崇桂 四首
又句

劉氏 一首

擷芳集卷之十七

古歛訥菴汪啟淑選

文星

字奎耀浙江西安縣人適江西金溪李光文著

有秋蟬吟艸

咏風

芳郊冉冉冒遊絲紅杏村邊拂酒旗飽逐布帆斜掛處
亂喧山雨欲來時鱸魚早自生鄉思茅屋空教感杜詩
試看洛陽花國裏吹開吹落總關誰

咏塵

引起東風望欲迷春城輦路雜香泥幾年妝閣生鸞鏡
是處關河逐馬蹄閒撲杏梁春燕舞暗飄柳岸夕陽低
山崖水次清幽地莫共浮雲度澗溪

劉淑慧

字守拙浙江會稽縣人澄海令劉德基之女也
適福州司馬魯楷著有芝雨堂稿

聞蟬

何處聲偏驟新蟬噪夕陽驚回午夢短吟徹晚風涼
露心長潔棲高韻遠揚千秋齊女化聽爾亦神傷

曉風

落葉驚殘夢臨粧怯素羅枝搖墮玉露月冷漾金波
數點鐘聲遠一林鳥語多亭前頻徙倚雲影淡銀河

焚香

清晝焚香翠幙籠靜窺色相悟無窮暫留裊裊春烟碧
漸化星星劫火紅一縷入雲原不幻數層浮靄已成空
箇中誰識真消息滿室氤氳付晚風

詠古十絕句

選五

當年一縷浣溪紗牽引興亡多少嗟若使夷光荆布老
至今應不笑夫差

西施

千古鍾情霸王多美人別去漫悲歌臙脂井上銷魂淚

洒向烏江更若何

虞姬

辭輦風高性更幽，偶因紈扇賦悲秋。詞中已識循環理，
花落花開莫漫愁。

班姬

出塞寧辭萬里遙，建功未肯讓班超。丹心不愧芙蓉面，
贏得單于拜漢朝。

昭君

功成欲速返瑤京，七百間闕夜獨行。十萬貔貅歸掌握，
玉顏原不讓書生。

紅線

林氏

江蘇金山縣人葉曼卿之室也

棣棠花盛開有懷二妹

棣棠垂金毬，相看不忍摘。花光入戶來，屏帳如金碧。思
念棠棣人，一水東西隔。憶昔掃花堦，同作花前客。今日
倚南窗，懷君不能釋。

秋夜花下憶妹

秋高氣深爽，夜靜銀河朗。花下納清涼，中心自懷想去。
年花開時姊妹同歡賞，今年花自芳。惟有清風享，誰云
路非遙。姊妹難來往，母誕方歸寧。歸寧豈舊况，移舟催
促行。此際誰能強，姊妹徒淚零。相送登舟上，追隨無限
情。分手心怏怏，今朝南北居。憶昔同閨長。

林氏

江蘇金山縣人適同邑貢生徐穎柔著有青蓮
舫詩鈔

同弟輩飲桂下

臨窻老桂發天氣乍涼時掃石依花徑論文舉酒卮共
憐秋易老更悵月來遲慢誦閒居賦高歌棠棣詩清風
入庭院金粟布堦墀久坐忘時暮衣單玉露滋

秋日卽景

薄暮秋聲起長空來雁羣涼風散蒸暑落日返餘曛水
面浮新月山腰鎖白雲空庭梧葉落蕭索不堪聞

秋煙

青微漠漠遠山浮雨霽寒林漫未收樓伴常隨香霧遶
月邊也學亂雲流障花彷彿佳人幔隔水迷離賈客舟
借問有誰堪領受荻蘆灘上一垂鈎

偶題

竹床睡起日遲遲薜蘿盈堦曉露滋抱病何妨消永晝
北窻風細共題詩

張孫儆

浙江山陰縣人適訓導孟稱舜

題和畫松

鬱鬱虬枝映碧空青青翠柏與誰同雖遇歲寒無改色

畫中畫出仿真容

圖繪寶鑑張孫倣紹興人訓導孟稱舜室畫松題和云云

董氏

山東平原縣人兵部尚書董訥女孫口北道思

凝女適同邑鄭從

題扇頭梅花

春風一夜到梅花開遍孤山處士家分得一枝團扇上

濛濛香月影橫斜

題水墨牡丹

魏紫姚黃錦樣般春風一夜玉樓寒何如尺幅藤溪紙

富貴常從淡處看

朱柔則

字順成又字道珠浙江錢塘縣人適沈生方舟

柴季嫺之媳也著有嗣音軒詩鈔

國朝詩別裁集方舟為紅蘭主人客道珠遙寄故鄉山水圖主人作詩有應憐夫婿無歸信巖畫家山遠寄來之句方舟旋歸當時傳為佳話

錢塘觀潮歌

候潮門外人如蟻午後狂風刮地起三折江流滾滾來
驚濤打入天門裏天門慘淡風雲變遠嶂重重看不見
初疑出海數片雲又訝橫江一疋練銀海齊傾雲山白

旬若雷鼓盤空碧危檣大舸簸不停勁弩強弓誰敢射
夕陽烟翠罷登樓尚有餘波不斷流素車白馬歸何處
一曲滄浪萬里秋

南屏道上

我愛南屏好香車此暫過碧泉秋澗少紅樹晚山多寺
近聞仙梵川長託棹歌風光有如此奔走奈君何

河渚觀梅舟泊柴氏園林

細雨雜溪聲沿流一棹輕舟依古岸泊人出小橋迎花
向名園得春隨步履生繞樓千樹迥隔水數枝橫亞竹
偏多色依松更有情邱林容小住心迹喜雙清賓主元

相契壺觴且共傾兼聞法華好欲往惜山程

題毛烈婦綉帽

烈婦從夫向九泉因看遺繡一潸然相逢記得持相贈
藏在香奩二十年

堅瓠集毛鶴舫先生女名孟年十三製繡帽遺柴
夫人靜儀以覆兒童頂許字方奕昭暨年十七隨
先生子浚儀宦邸方子從京師來就婚時患脾疾
已劇結繡甫三日而方子歿烈婦以三朝新婦稱
未亡人墜樓不死絕粒十有九日而卒柴夫人臨
終以繡帽囑冢婦朱少君柔則曰當藏之篋笥以
垂永久康熙巳卯春少君發笥見帽作七言絕志
感閨秀遞相傳玩以爲烈婦手澤相與倡和成帙
朱柔則順成詩云云王元禮詩云一段幽貞麗管
形鍼神還與雪娘同開奩忽墮思君淚酒向當年
手澤中嚴懷熊芷菴云深閨昔日贈羅巾繡出名
花不染塵篋笥頻開香未絕至今猶憶墮樓人吳

湘婉羅云花羅半幅抵千金持贈猶憐一片心莫
遣爾翁親遺繡白頭悲汝恐難禁予得之錢塘友
人辛巳夏先生過予齋
見之不禁泣數行下

蕭氏

安徽歙縣人夫柴某別娶茂陵十年不返翁姑
繼歿惟與小姑并處長齋繡佛無怨懟聲孝廉
潔菴其兄也偶抄松花神女落花詩寄之淒然
步韵然戒勿示人故世罕知之

落花

半規殘月照枝空黯黯飄零薄命同自淪龍芽聊當酒
碧桃花下祭春紅

望眼癡懸駟馬橋迴文幾度只虛挑鏡臺左右花飛滿
時點仙郎白玉簫

藕絲衫白鬢絲青慵理殘粧靠錦屏一夜宜男花又落
斷腸情緒幾回經

雨妬風吹損玉膚惜花人遠倩誰扶衰紅巧絆鴛鴦線
莫嫁如兄戲小姑

偶折殘枝上鏡臺惜花憔悴替花哀自憐花瘦人還瘦
人瘦爭教花惜來

渺渺殘魂耿耿眠曉窗心事護花先五更風續三更雨
何處藏香更有天

落紅如雨點晴沙
髻插烟絲只柳芽
却感杜陵詩是史
滿溪花照四娘家

錯嫁東風悔莫留
月媒還向月娥求
願爲侍婢偷靈藥
不願銀河織女收

陸令和

字靜偕江蘇長洲縣人也

輓仲姊靜宜

君家嫁女勝於男
男讀詩書女更諳
一自棠梨寒食後
杜鵑啼血滿江南

馮氏

四川邛州人劉睽度之室也

春日卽事

閒步小橋東
黃鶯處處逢
梨花風雨後
人在綠楊中

王士正隴蜀餘聞劉道貞字墨仙邛人名士也明未起兵討張獻忠不克病卒于軍妻子皆遇害其子睽度妻馮氏詩甚清婉

商婉人

浙江會稽縣人

贈沈礪芳

細筆猩紅絕妙辭
掃眉牕下拜名師
從來玉秤稱才子
樓上昭容字婉兒

香祖筆記會稽女子商婉人能詩工楷法仿吳彩鸞寫唐韻作廿三先廿四仙武林沈礪芳名蓀爲題絕句云簪花舊格自嫣然顆顆明珠貫作編始識彩鸞真韻本廿三廿四是先仙商本老學究女兼能制舉文字嘗手評沈文一卷又贈詩云

夏氏

江蘇吳江縣人

次杜瓊枝壁間韻

妾吳江人也以色見絕于人攜入風沙之地命也天實爲之偶見前韻不覺淚下率筆和句幸憐我者勿噴飯焉

落難煢煢病不支紅顏命薄苦流離粧臺故國塵封久
踪跡他鄉夢未知生死何勞啼血淚馳驅無意和新詩

世間大半沙咤利安肯黃金慰所思

金如式

字德真安徽全椒縣人也

偶成

一片濃陰翠欲連惜春又是夏初天其如過眼繁華盡
無那驚心物候遷雨密暗知蕉葉長烟晴漸逼柳花旋
青雲碧海誰能判惟見諸峯似昔賢

寄弟

鴈字頻傳問起居文園貧病近何如垂楊亭子梧桐院
好耐春秋讀異書

婁 巽

浙江杭州人

賦得三月三日天氣新

三月三日天氣新
隋堤祓禊有佳人
穠桃弱柳爲寫真
十八鬟垂粉黛勻
遠遊文履踏陽春
羅袿冶袖繡鳳麟
拳裳持畫楫
清歌美倩郎
丹唇採蘭擢
素手隨風弄
水翥燕身飄搖可望不可親
窈窕迥出燕與秦
金屈卮盈酌縹酒銀絲縷
細膾飛鱗鳩鳴芳樹挂酒旆
花落晴川拂釣綸
短簫橫笛落香塵
遺鈿墜珥奚足珍
霧綃翠飾擬洛神
朱輪裏裊綠楊津
鷺鷥鸚鵡不記巡
芳園處處列錦茵
元鳥上下動藻蘋
蘭亭小榻書縑巾
青裙縞袂不可倫
伊其相謔羅敷嗔

題李太君遺照

披拂生綃望儼然
正襟危坐石峯前
穿墉昔佐山公鑿
判薦曾聞湛女賢
陽羨春茶浮椀碧
迦陵小鳥掠花旋
他年會返遼東鶴
可識寒閨草素牋

憶女

皎皎中庭月
哀哀孤雁聲
憶兒渾不寐
合眼話平生

張淑貞

江蘇丹徒縣人

秋思

人靜燈如夢羅衣怯晚涼壁蛩吟草砌梧葉下蓮塘月影逐花動笛聲愁夜長倚欄無一語心碎爲思鄉

落梅和韵

信過梅花忽報殘驚傳題詠滿雕欄人憑官閣月千里簾捲江城雨一壇舊夢園林憎薄暮新粧天氣惱餘寒從今玉笛休相倚飄亂簷前不忍看

月夜與蘭嫂話舊

五年人事幾番更悄語寒幃夢不成滿地霜華夜吹笛二分明月對眉生

周巽

字順吉浙江山陰縣人分宜令周開緒之女適仁和諸生沈心工書法精繪事著有須曼閣小稿

秋夜聞笛

今夕是何夕忽聽蒼龍吟成連之海上千載有遺音窺戶月如水隔牆風滿林漏聲吹忽斷不盡故鄉心

鑑湖春泛

鑑湖三月好韶光碧舫青簾逸興長隄柳絮飄來燕子山桃花落出魚秧畫屏岸列千層嶂寶鏡奩開一曲塘

佳境詩人爲管領至今人說賀知章

晚晴仿吳體

日長無事撻吾寧夕陽影遠簾波青山光明淨列虛牖
樹陰濃淡涵幽庭花間小立黑蛺蝶雨後亂飛紅蜻蜓
欲仗佛緣離宿垢焚香還讀貝多經

自題畫竹二首

直節不易見虛心自多益寒玉影數竿照水寫湘碧
不學管仲姬不師文湖州隨意落筆去風雨一片秋

題李是菴水墨牡丹

元興賦裏想芳姿玉篆牌懸第幾枝想見深閨多逸韻

含毫不用買胭脂

顧可貞

字含章江蘇長洲縣人適同郡胡抱一著有凌雲閣詩鈔

秋月

群峯收夕照孤月破秋煙一片眼空闊幾回神寂然光
飛絕域外影落美人前終古離憂者相看長自憐

題畫

清水出芙蓉本不事雕飾戲移藏筆底臨風更生色

綠萼梅二首

遲日和風映碧苔
珊珊疑作綠衣來
須知歷盡冰霜後
始向百花頭上開

前生料是九疑仙
謫向孤山閱歲年
贏得疎癯丰致好
月明林下自翩翩

姜氏

字淑齋號廣平內史
山東膠州人順治己丑進士
廣東布政使宋可發子
婦有淑齋詩草

中江縣驛館題壁

清泉石上溜
松風薄受霜
華葉乍紅
曲路通村知遠近
一條竹杖萬山中

池北偶談中江縣驛中有膠州閨秀姜氏題詩云

漁洋蜀道驛程記次中牟縣巡行牆柱間見膠州宋童子世勳題壁大字方圓徑寸勢甚飛動東粵方伯艾石幼子在華陰見之未及羈貫艾石子婦姜字淑齋亦工撫晉人書京師士夫得其統素便面多珍秘焉

朱竹垞葵尊題姜夫人淑齋詩卷太常引詞云三真六草寫朝雲幾股玉釵分彷彿衛夫人問何似當年右軍鬱金堂上青綾帳外小字詩初聞門掩謝池春定書遍雙鬟練袿

周僖齡

字鶴英江蘇武進縣人周玉燦之姊也適同邑

張繩九著有落花詩集

櫟園周亮工落花詩序詩人性情每寄託于草木山川草木山川無一不供詩人抒寫故于詩

人中有賢女子於草木山川中有落花亦猶風散蘋末流靜山溪而偶然相遭便湧無方綺縠耳必謂落花詩宜于賢女子何其隘于視詩隘于視周子姊詩哉雖然一落花耳而致詩之多至滿三十韵觸緒增懷紆回盡態于委蒼點碧之中極辭條就影之致覺少陵一片花飛殊逕促耳豈獨傷心零落有風人嘆惜之情也哉後之賦此題者稽往什而及是詩安能不閣筆嘆止矣子因玉燦而得讀其令姊詩不猶取火于燧哉

落花

霏霏拂拂女墙東小鳥頻啣掠午風亂點碧苔香寂寞
輕搖素月影朦朧芳心欲逐啼鴉碎深院俄教蝶夢空
最是無情長夜雨五更流徹一溪紅

沉香亭畔獨徘徊傾國傾城盡屬灰珍重幾曾緣客掃
飄零無限送愁來崔生題句門空掩秦女游仙鳳不回
莫向東皇頻悵恨百年生事總蒿萊
離愁欲語更含情麗質甘同一葉輕晴曳新雲猶有態
冷拋曲檻更無聲芳塵暗逐蜂魂亂碧萼頻敲鳥夢驚
幾欲裁詩爲贈別晚來憔悴未能成

昨夜風姨到上林六宮冶艷盡浮沉徐娘老去丰姿在
湘女啼時血淚深間寫殘箋描綵筆欲留新樣度金針
江東日暮遙相憶流水蒼茫何處尋

郭媵

字景曹浙江仁和縣人儒士郭天一女適進士

王礪松子詔三著有竹牕吟稿

寄段雨洲二妹

姊妹經年別吳甌千里餘啼殘襟上血望斷海邊魚對鏡思雲鬢因風寄素書書中無別意惟悵久離居

鄉思雜咏

偶於清曉捲珠簾好放雙飛燕出簷忘却此身原是客又收山色入詩奩

華蓮修

字大蓮江蘇無錫縣人費仲雪之室也

遺詩

六首選二
有小序

抱病彌年今將永訣勉占六韻口授兒曹氣促言蕪聊慰生我兼以自慰云

思家慈

夜闌燈炮夢中歸却喜山塘露乍晞又被白雲遮渡口迷離何處省慈幃

遺夫子

利鎖名韉不自寬名閨多少抱征鞍如儂夫子長貧賤半世蘊鹽夢亦安

吳氏

安徽歙縣人適同里江含徵詩見清淚痕集

輓張山來淑配吳少君

吾家延陵裔擇偶嫁張郎風雨詩應富昔吳娘有風蕭蕭郎不歸之句
蛾眉畫未央低回憐破鏡倏忽遂埋香剩有雙雛在相看淚萬行

杜小英

湖南辰州府人

絕命詞

家鄉一別已遭兵此日含羞到漢城忽聽將軍搜括令
從容江上畢餘生
厭聽營兒帶笑歌幾回腸斷嶺猿多青鸞有意隨王母
空教人間設網羅

骨內輕拋弟與兄依人千里夢長驚歸魂若返家園去
報說雙親已不生
照影江干祇自悲永辭鸞鏡斂雙眉朱門空許諧秦晉
死後相逢總不知

遮身猶是舊羅衣夢到瀟湘何日歸遠涉風濤誰作伴
深深遙祝兩靈妃

當時閨閣惜如珍何事牽裾逐水濱寄語雙親休悵恨
入江猶是女兒身

少小叮嚀畫閣時詩書曾託母兄師濤聲夜夜悲何極
猶記挑燈讀楚詞

征帆又說過雙孤掩淚深深怯夜烏寧葬江魚波底沒
不留青冢到單于

生平曾許未簪笄深入狂瀾嘆不齊河伯有心憐薄命
東流直繞洞庭西

猶勝王家共事臣
圖史當年講解真殺身自苦欲成仁簪纓雖媿奇男子

長沙府志逆流烈女寶慶推官朱某之長沙舟中見一屍逆流而西心異之百計拯出則絕色少艾衣密縫無寸隙懷中絕命詩十首裹以油紙云云朱某子名直者述之甚詳善化貢生萬機作詩記之並為請附志中以傳其事
楚詩紀辰州女子也甲午大兵定辰湘敵掠難婦萬餘人小英為兵長曹姓者所擄屢以計給之攜

至漢上知不免乃作十絕書本末挾懷中赴漢江死七日逆流直過洞庭始浮出漁者得之面色如生

軀賸長沙朱氏女遇吳逆之亂盡室星散弱質無依遂為營卒所掠氏志堅意決眾莫敢犯舟行至小孤山下奮身投江其屍逆流三晝夜浮于故居水濱夢訴于其父母父母驚起跡之果獲女屍慟哭收殮玉顏如生解其襦得懷間絕句十章重緘密紉字不沾濡

沅陵志節女姓杜名小英辰州沅陵人順治甲午掠于兵軍帥曹某欲納女泣告曰吾父喪未滿乞齊戒三月帥許之將掠九江臨發賜以鏡英知不免復曰吾欲文祭母江上比至踴身投水死後屍逆流而上至洞庭數十日面色如生詩十首裹以油紙繫衣帶間

夔齋詩話蕪湖施天驊字河采嘗泊舟漢江有女某氏自洞庭來投江死土人瘞之得胸前尺帛書十絕句

葉氏

浙江餘姚縣人字寶林遺獻先生黃宗羲配也
生于萬歷己酉年卒于康熙丙辰

歲暮

歲暮何多感蒼黃日脚斜嬌兒已去膝竹馬尙留家柳
老風如哭梅寒雪不花去年除夕事魂夢痛無涯

避兵入城因憶壽兒

汝骸已臥千山去汝魄猶應傍戶庭入口拋兒同避亂
空房尋我定生驚淒涼窗隙朝穿燕寂寞階隅夜照螢
不憤嚴城聞擊柝難禁紅淚滴三更

夢

夢中作夢日悠悠究竟何曾有斷頭槐國旣無分晝夜
漆園那復論春秋半窻月吐三更影一枕風含萬古愁
不識有誰能獨醒揭開宇宙豁雙眸

劉淑秀

字慎勗江蘇江都縣人

憶妹

自別和顏倍黯然思維永日淚空懸猶思刺繡西牕下
尙憶分吟皓月前苦恨暫違春暮後仍期相見桂花天
愚衷有此應知否腸斷東風曉夢邊

詠眉

鏡裏春山兩點青由來不許俗愁侵每逢花落春歸後
宛轉間顰不自禁

程氏

安徽休寧縣人詩見蝟吟瑣記

輓綠衣女子

甲寅羅賊擾徽女子被擄不屈死之時年十五
死時衣綠衣人稱綠衣女子葬大園山下

無端烽火擁山城白屋朱門苦不禁露泣風飄無定所
珠沉玉碎有徽音生前祇信心如石死後焉知身鑄金
望斷大園山下草至今猶染淚痕深

斷臂投崖事可傳忽驚嬌小倍堪憐盈盈十五誰家女
渺渺千秋紫府仙青塚荒涼看走兔白楊蕭瑟隱啼鶉
於今廟祀追前列多少鬚眉盡赧然

張崇桂

字秋崖江蘇華亭縣人張東海太守之後工詩

善畫適徐國學承熙

題畫四絕

危嶺躋攀蜀道難濕雲釀雨逼人寒山家多少閒風月
過客多從馬上看

白石流泉下碧潭竹林深處有茅菴綠陰匝地無人到

鳥喙松花上佛龕

雲歸鳥倦晚風柔細草蒙茸碧似油料得繡餘人獨坐

一鈎斜月杏花樓

山光水色雨依依柳綠拖煙罨釣磯憶昔曾從溪上過

渾疑空翠濕人衣

句

留得一枝好收拾西風無計如紅顏

墨香居畫識張崇桂字秋崖東海翁裔孫女少時習女工外好讀書解吟詠善小楷二十歲歸徐復園事翁姑極孝暇則學寫花卉禽蟲枯木竹石筆意娟秀生女各妙慧慶甫六齡日誦詩數首愛若掌珠丙午春殤於痘至秋對菊淚下曰我不能見此花之復開矣遂對臨數花於簞上有留得一枝

好收拾西風無計如紅顏之句後漸羸瘦適翁臥病勉進湯藥翁沒後病日重至危大呼妙慧慶數聲而逝始知抱喪女之戚前有翁在而不敢露也復園為予道其詳如此存年三十有二有秋崖題畫詩一卷未刊

劉氏

直隸奉天人

臘盡

悶殺連朝雨雪天教人何處覓黃綿歲除不比清明節

底事厨中也禁烟

夜譚隨錄奉天劉公未遇時故世家子少儻好客揮霍不吝門庭如市忽有崔元素者投一刺劉接見詢其邦族曰山東臨朐秀才也遊都門聞公喜結納來作食客耳劉與之往來亦時濟其薪水

崔率十餘日一至至必有所借貸如是者二年餘
 劉連遭大故貲產蕩盡一貧如洗親故白眼相向
 動輒得咎婢僕逃散僅存一老者內則一妻一子
 一女會臘盡牛衣塵旣無以卒歲女能詩戲吟云
 云劉見之笑曰此際玉樓起粟因和之曰今年猶
 戴昔年天昔日輕裘今破綿寄語東風休報信春
 來無力出飢烟妻怒之以目曰年盡歲逼喫着俱
 無猶不少思籌策乃合兒女子作推敲醜態耶

擷芳集卷之十八目錄

才媛詩

古歛訥莽汪啟淑選

陸么鳳 三首

郭 玢 一首

陳崑璧 二首

邱 珠 一首

張勤淑 四首

唐 氏 二首

黃淑窈 句

黃淑琬 四首

葉 氏 四首

花含英 三首

吳 蕙 六首

戴王萼 二首

倪 氏 句

黃之柔 三首

谷 氏 二首

沈友琴 三首

沈御月 四首

盛 氏 十二首

林瑛佩 十六首

葉 舫 六首

湯文玉 一首

陳 娟 一首

黃景蘭 二首

徐 賢 句

孔少娥

一首

徐氏

一首

擷芳集卷之十八

古歙訥菴汪啟淑選

陸幺鳳

浙江錢塘縣人

秋閨晚思

晚來疎雨過人頭
風靜羅衣颺不休
漫拾亂紅題小字
暗驚新句又悲秋

湖煙漠漠晚鴉鴉
自掃楓香坐煮茶
一帶芙蓉寒映水
那知秋思屬兒家

翠黛宜嚔不耐嚔
病逢秋氣轉傷神
空堂莫掛疎簾起

黃菊丹花惱殺人

陳維崧婦人集云錢塘女子陸么鳳年十四而卽善吟嫁夫游學於外陸頗秋思其詩云云

郭 玠

字依雲江蘇江都縣人

瓶中碧桃

數枝迎面屬知音謝絕游蜂細雨侵不向東風怨零落
幽牕片月伴閒吟

陳崑璧

字玉君福建莆田縣人也

悲梧鳳

有桐生崇岡團團如偃蓋居然琴瑟姿已遇風雲泰鳳
時棲其上羣鳥歌且拜豈知千年根中路柯葉壞出非
不得地盤踞誠高大天道忽難憑一夜霜飈改丹鳳本
靈雛哀鳴翔乎外鴟鴞志意滿踞巔恣吞害有人或見
之佇立久嗟怪予亦聞此故悶倚無聊賴

駐馬孟津署中習射

風塵蕩蕩馬蕭蕭孟邑停車學射鵬畫角鳴時諸媵肅
丹旗捲處晝雲消軍門漸識穿楊技閨閣何妨奪錦標
願與平陽齊偉烈助君此日得三貂

邱 珠

字川媚江蘇青浦縣人適巡檢符湘文著有織

餘草

瑣牕感作

芳草萌新翠疎梅逗暗香人情如紙薄愁緒逐年長空
作牛衣泣徒搔鴉鬢蒼離亭望柳色幽恨滿河梁

張勤淑

字友琴四川遂寧縣人適舉人吳翀著有翠苻

齋吟

古檀詩話閩秀詩于妍雅中貴帶豪氣如吳艾
香孝廉狎孺人張友琴勤淑為遂寧相國裔對
雨懷成都鄜鳳巢安人羈寓南徐云寒雨侵簾
通海氣疎鐘到枕帶江聲又海澄公蘇夫人又

珠世璋塞上曲云莫怨君恩薄都緣妾貌差胡
塵猶萬里離恨訴琵琶與沈宗伯明妃詞云
帳琵琶曲休彈怨恨聲無金酬畫手妾自
誤平生異曲同工可媿美綠淨軒稿矣

壽姚母

朱炎甫退深秋節白帝司晨中無射金飈不渝歲寒心
坤道成貞全懿哲西泠有母操如水淑慎威儀四德稱
曰嬪于姚方未幾驚鸞絕鶴忽飛昇洵乎立志成巾幗
一片玉壺成鐵石上承堂上慰親心下撫孤兒淚痕積
延賓馭下咸有方中外嘖嘖稱賢良歲時伏臘誠祭祀
有齋季女承筐將事業駸駸日漸起家聲不墮資調理
庭前蘭桂挺芳芬膝下承歡應自喜君不見關西合族

適名楣不矜不傲敬以期謝庭咏絮未云貴古來淑質
如班姬今看黃菊東籬遶雲璈集奏音縹渺高堂永日
享長春願頌南山恒不老

舟次夢與竹西徐安人話舊早起欣然有渡江之

想

夜靜絕囂塵離懷入夢頻江分南北岸月照去留人往
事真堪笑新詩誰與論明朝風日好鼓棹莫逡巡

秋杪偕孫小月喬蝶來二女史遊平山堂拈韻得

懸字

岡阜高低斷更聯堂開慶歷姓名懸風流未墜長江畔

山色猶存古寺前日晚芙蓉供醉眼秋高楊柳罨寒烟
歸來月與吟鞭近已過城西幾頃田

對雨有懷成都鄜鳳巢安人羈寓南徐

浣花箋舞峩眉雪十載淒涼鐵甕城寒雨侵簾通海氣
疎鐘到枕帶江聲醉吟應有清新句愁坐還添羈旅情
我欲扁舟話離思拍堤春水正盈盈

唐氏

江蘇金山縣人貞女唐冰心之姪女敏慧好學
工詩善楷書適何昌齡著有翠雲軒詩稿

乙丑春正送二叔父如燕

東風初解春江凍驅馬踟躕欲遠行薛澱暮雲增別思
盧溝曉月照離情三秋鴈若投南日一紙書先寄苧城
莫道逢迎天下少五侯不減鄭莊名

晉宮詞

宮外陰陰弱柳青誰言君性似浮萍六宮折盡春園竹
玉輦何曾下翠庭

黃淑窈

字姒洲福建晉安縣人黃莘田之長女適諸生
游藝

句

接席簪裾多後輩稱觴兒女半華顛姓名千佛標金簡

恩禮三朝錫老年

香草齋詩話乾隆壬午予年八十復膺重宴鹿鳴
盛典諸戚友及四方郵寄各贈言金薤琳瑯盈
箱積帙予愧不敢當而閨秀諸什亦有
可傳者如接席云云余女淑窈句也

黃淑窈

字紉佩莘田次女也適林生春起

飛來寺

水色連平野鐘聲出翠微山僧迎日立江鳥背人飛古
洞藏猿語荒泉濺客衣禹陽雙帝子燈火照巖扉

送姒洲姐歸永陽

離情脉脉草芊芊樹底喧禽欲暝天細雨觸人花有淚
春風牽恨柳如烟對牀共話添紅炭剪燭分題劈彩箋
明夜太原灘上月可能無夢謝庭前

題杏花雙燕圖

艷陽天氣試輕衫媚紫嬌紅正鬪酣記得春明池館靜
落花風裏話呢喃

夕陽亭院曲闌東語燕時飛扇底風不管春來與春去
雙雙長在杏花中

榕陰詩話莘田二女皆擅詩名長曰淑窈字姒洲
次曰淑婉字紉佩紉佩有題杏花雙燕圖云云時
人皆稱之

葉氏

江南吳縣人翁駕徵之室也

七十二峯足徵集氏居革頭南陽名媛也知書
達禮諸姑姊姒咸奉為準則其作詩也不暇研
鍊衝口而出意到筆隨時有妙語其
季父世南嘗稱之曰此吾家道韞也

十六夜對月

昨夜冰輪滿今宵影未殘高懸銀漢迥斜照玉階寒憶
遠應同望憐秋更獨看空庭花露濕猶自倚闌干

自君之出矣

自君之出矣書卷任縱橫思君如百舌春去自吞聲

梅花隴

雖非金谷散香塵手澤傳來歲歲春一隴寒雲數椽屋
青山高卧白衣人

戲贈席文淵翁夫人

蛾眉橫秀筆花新寫盡妝樓繡閣春寄語綠天花月道
莫驚風雅屬佳人

花含英

浙江仙居縣人適長洲張源長著有鶴閒堂草

追和漁洋山人秋柳

四首選一

瘦腰愁黛總相憐那有垂絲冷暮烟秋雨樓中三弄笛
夕陽亭外一聲蟬黃花無恙辭官日白首關心種樹年

每憶青帘沽酒處枝枝憔悴畫橋邊

蠟磯靈澤夫人祠

江流右轉失吞吳家國關心空霸圖一自子規啼不返
月明雙淚泣蒼梧

讀蘇髯公范增論

亞夫奇策佐江東得鹿中原預有功但識鴻門謀漢帝
不將弒楚諫重瞳

吳蕙

字佩芳江蘇揚州人

立春風雨寄夫子僊石

漁洋詩集
卷十八
七

何事逢佳節輕寒逼絳紗風將舒柳葉雨欲洗梅花良
宴今何在青燈話舊家雷江共春酌曾否念天涯

落葉

隨風陣陣打欄杆日日園林看漸殘徑僻積深迷舊路
山空禿盡出層巒烟中不見千重綠霜後還餘幾處丹
却憶吳江正寥濶一泓澄練晚波寒

客中書懷次夫子仙石原韻

愁心相對一燈燃耳畔砧聲起四邊待月未來聊散步
拋書無那略欹眠人歸大抵黃花候客夢先驚白鴈天
楚水吳山空悵望幾時纔放廣陵船

憶家大人之姑蘇

依人無奈豈忘家想見登樓起嘆嗟計到姑蘇應一月
洞庭山上望長沙

雨中聞笛

誰吹玉笛斷柔腸零落梅花半夜霜只與猿聲共悽絕
那堪風送入蘭房

聞鴈

鄉心日日淚空彈無那秋聲入夜寒愁絕夢中驚覺後
蕉窗細雨一燈殘

戴王萼

字綠華浙江諸暨縣人適同邑諸生余蔭祖
送外重之河北幕

一輪冰鑑滿照見物華新入幕君寧貴持家我固貧素
絃揮寶瑟清淚掩羅巾去去還無恙前途有故人

謝外寄春衫

窄袖春衫小樣新勞君遠寄別離身幾回對鏡增長嘆
不是當年綺麗人

倪氏

江蘇江都縣人著有鷓鴣怨集失傳

句

已作藤蕪離恨草莫看菡萏並頭蓮

陳維崧婦人集江都倪氏有鷓鴣怨集其本序云內
子爲閩中巨族依其舅氏於白門孟夏歸余一病
不起客有善李少君術者爲余招內子魂叩生前
事歷歷如響復作詩十數章本序後附懺詞云生
於閩海長於西江又云衣不曳地七襄錦織鴛鴦
案可齊眉六禮書連鴻鴈乃以兵戈萍散魂驚拍
裏悲笳兼之骨肉花殘影落天涯畫角爰求媒妁
締此姻緣纔咏關雎忽嗟瘖馬前端陽之一日細
翠埋幽曾合色之幾時爐香化燼又云廿五年
之粉黛辛苦同休十九日之牀帷沉疴不起

黃之柔

字靜宜號玉琴安徽歙縣人吳園次之室也著

有玉琴齋集

園居卽事

揚子集 卷十八 九
避俗聊尋勝山園景物幽半篙春後水一笛雨中樓刻
竹驚棲鳥拋花引戲鷗還邀諸女伴更上木蘭舟

龔鵠紅過訪惠山次韻奉答

簾捲飛花落硯池掃眉才子坐題詩兩山烟雨青無限
總是雙蛾半蹙時

寄暢園同鵠紅作

一道鳴泉繞碧亭飛花落絮滿漁汀自從謝女吟成後
不許人間俗耳聽

谷氏

廣東南海縣人蕭志崇繼室也著有鳳凰集

過花田偶賦

美人重憶粵江前草色蟲聲思黯然玉匣已凋宮井冷
土牆仍在野狐眠一尊醇酒愁中酌幾曲清歌夢裏傳
最惜芳魂千載後姓名依舊在花田

夢過司馬長卿鼓琴

夢中形影自沉沉恍到臨邛秋已深不見文君仍賣酒
但看司馬獨彈琴千金尙憶當年賦一曲猶傳此日心
醒後徘徊何處是教人無路可追尋

沈友琴

字參苻江蘇吳江縣人沈旋輪之長女與妹織

阿俱工詞賦時稱聯璧適周銍著有靜間居稿
一卷

和汪鈍翁姑蘇楊柳枝詞

池塘最愛護黃鸝狼籍春風日欲西不是謝娘曾借咏
幾乎墮水又黏泥

靈巖

靈巖山畔綠陰稠賦月疎鐘歷幾秋最是館娃人去後
梵音不散古今愁

擬閨怨

香冷薰爐夜氣寒塞鴻聲咽燭花殘更長夢短渾無賴

淡月籠烟不耐看

沈御月

字緝阿參苻妹也適皇甫鏗著空翠軒稿一卷

秋夜

雨伴疎鐘度越溪絲裁錦字寄關西風燈夢斷催寒雁
片月魂驚喚曙鷄烟繞平江紅蓼晚波搖遠岫白雲齊
畫屏香冷琵琶歇船有潯陽商婦啼

和汪鈍翁姑蘇楊柳枝詞三首

一生眉眼太妖韶又向吳宮門舞腰贏得遊人多少恨
最繁華處最無聊

廣陵從昔綠楊多
殿脚三千唱艷歌
爭似虎邱飛畫槩
銀塘弄影罩新荷

年來澤國浪滔天
萬卉飄零不復妍
獨有柳條偏愛水
晚風斜拂釣魚船

盛氏

安徽安慶人

花影

落徑全無色
開門滿地花
因風搖砌石
隨月舞窻紗
歷亂江淹夢
參差杜甫家
老來何所事
於此悟空花

釀酒

釀酒多年學
今冬得好方
晨興加麴蘖
夜起試溫涼
豈似茅柴味
差同琥珀光
祖宗猶未獻
兒輩莫先嘗

示幼女

垂幕深深坐
看兒淚雨揮
諸兄俱已娶
阿姊亦于歸
近世人情惡
衰年心事違
可憐渠最小
燈火炤相依

高孫到家

生長不曾見
今年始到家
孫兒神氣爽
祖母鬢毛華
牽傍懷中立
攜從膝上加
因思居各處
轉覺淚如麻

曉起

雞唱開寒柵
蟲吟住短牆
熏籠無宿火
衣架有餘香
心

事誰能識窮愁每自傷呼兒書早讀莫待日高粱
兒輩到家

煙霧千層鎖翠微衰年難倚竹籬扉春殘雨帶桃花落
日暮人同燕子歸負米那曾心得遂窮途空覺淚頻揮
忙催小婢炊羹飯忘却呼兒解濕衣

月夜同兒女坐話

江上霜鴻叫二更窻前兒女話生平月明簾命奚童掃
鑪沸茶看小婢烹髮爲愁貧容易白詩因懷遠忽然成
閨中不省都門路昨夜何緣夢到京

夫子到家

俄報征輦到草堂迎君攜手淚沾裳乍歸顏忽相驚老
久客鬚疑較昔長此日聚談如夢寐十年蕭瑟嘆炎涼
飲餘兒女歡如許莫看糟糠兩鬢霜

夜雨

三月江南夜雨多草堂前後漸成河牆垣屢促誅茅蓋
其奈山童懶惰何

水灌柴扉欲到魚挑燈起坐費踟躕杏花林裏三間屋
喚醒兒曹怕濕書

鵲兒

簾外蕭蕭落木聲懷渠兩載客燕京鵲能巧慰家人望

不是歸期也詐鳴

秋日接書信

小小花箋印折梅秋風客報欲歸來一言好向黃花囑
莫謂重陽太早開

林瑛佩

字懸藜福建莆田縣人林西仲先生長女也適

三山鄭郊著有林大家詩鈔

福建通志林瑛佩字懸藜雲銘女適拔貢生鄭郊年十四時雲銘遭變下獄脫簪珥數千緝謀贖父命匿幼弟萬山中身任家務親寄饋餽藏利刀衣袂間以死自誓雲銘卒免於難母病刲臂以療病尋愈夙能詩有唐人風味著有詩鈔及懸藜遺稿二卷

見山樓墨話林孺人瑛珮詩文清真雅逸絕無香奩嫵媚之詞讀張左垣太史傳毛西河先生序知孺人智深德粹乃閨閣之英雄豈特饒林下風惜壽夭不能廣其型範以易時俗耳

秋夜寄夫子

獨立秋風前細訴秋風知一片別離情盡倩秋風吹

與三山客孤窻夢醒時

香草齋詩話侯官林瑛珮字懸藜杭州推官林雲銘女適拔貢生鄭郊聰慧能詩有詩鈔懸藜遺稿嘗有秋夜寄夫詩云云又有千里夢隨閩嶠落數行淚趁浙潮生之句人競誦之

冬至夜

愁多已不堪况復逢改序傷心憶舊年燈下歡相聚今夕亦如茲痛母歸何處淒淒不敢啼恐觸嚴君故堂前

暗斷腸入房淚如雨

登樓寄夫子

憑欄試一望山色入樓蒼野寺藏深樹閒雲度遠岡雨
餘花故落春盡燕還忙無限登臨思翻成離別傷

曉發

客舟爭早發軋軋細流前晨色篷牕入山光遠水連樵
歌含嶂霧漁夢宿江烟何處鐘聲落蒼茫翠裏傳

舟中晚望

江上村村暮扁舟野望長遠烟浮樹白荒日帶山黃蟬
噪深林急人歸古渡忙更憐孤岫外飛鳥兩三行

苦雨

風雨兼旬至江城五月寒冷烟侵翠幙宿霧濕雕欄燕
子飛還墜荷蕖放遂殘黃昏增悵望大地水漫漫

雨中新柳步官五韻

微茫春色小枝頭隔水長堤細浪浮青眼半窺空有淚
黛眉欲展又含愁雁歸雲外三千里人在煙中十二樓
雨脚絲絲同織恨滿天離思笛初收

秋夜

蕭蕭梧葉已驚秋玉漏將殘思正悠一枕夢隨千里客
半牕月照五更愁鳴蛩露冷悲荒砌飛鴈霜寒下淺洲

無那金風喧鐵馬聲聲偏透入重樓

寄夫子

自君判袂數歸期寂寞年華望裏移短枕淚隨流水遠
深閨夢入萬山遲孤鴻飛斷雲千疊杜宇啼殘月一枝
最是無情牕外柳畫眉人去故絲絲

走馬燈

何處軍情警報來嚴宵輕騎遶城開無聲多是啣枚走
有檄誰堪倚馬裁背水不如環火陣防秋偏欲上春臺
功名已繪凌烟閣猶戀邊關不肯回

聞鴈憶杜若姝

孤鴈際天飛思羣鳴不已聲聲何太悲恰入離人耳

九日寄父

強對茱萸只自悲雲天萬疊望中疑閨人不識登高路
腸斷當年叱咭詩

雪夜哭母

反哺慈烏義且高自悲無處報劬勞願將一片思親恨
化作江聲咽暮濤

舟次夢同雍家姊歡笑如平日覺而無聊推篷遙

望四顧寂然遠樹烏啼曉烟漠漠愈增離思口

占二絕

漫言身遠即情疎昨夜逢君事有無夢裏可憐難耐別
分明和月到西湖

推篷寂寂聽啼鳥曙色纔分樹半無一片離心何處是
隔江孤鴈叫平蕪

乙丑人日感咏桃花

瑤池仙子隱真香愛向春風淺淡粧一種天姿人不識

浪傳流水引漁郎

鄭邴記懸黎彌留之時余偶請仙凡云係瑤池仙子誓謫人間與余有夙緣今當歸去此詩原集所無今歲仲夏里中火余急取藏繡囊乃得之味其語意與凡判相符若預知有今日而故示其意者且懸黎生死及歸余皆春月又與次句相符亦一奇也

葉舫

江蘇吳縣洞庭東山人適周孔嘉

七十二峯足徵集葉孺人諱舫東山人所居白雉灣擅湖山之美孔嘉少有四方志効力河工孺人操持家計米鹽瑣屑不廢吟詠性喜梅于所居之高阜築亭其上環植梅花匾曰梅語花時瀟望不亞衆香國也孔嘉間歲一歸邀名士觴咏其中吾山觀梅素推長圻攬勝石自有此亭遂為遊屐必至之所而傳之歌咏播為美談則孺人之冷韻清辭有以傾動一時也長女蕙亦能詩詞早亡無傳

古意

涼颼蕭蕭秋夜入沉吟不語坐虛室銀釭欲滅月恰來
同坐同看重悲泣忍妾淚聽君歌歌未已泪轉多含情

體意妾奈何不貴此時淚所貴終心常是初

落葉吟 有引

夫寒山一絕百紀維新江令片言千秋永賞
居山澤花木爲羣運錯彩於霜華文標天趣映
高山之皎月舞韻風吟落花固是愁端墜葉豈
非怨質當茲搖落想榮盛之難期覩此飄零益
淒其之莫已有懷
難寫聊付清吟

年華易逐秋光老秋聲漸促秋容槁飄黃點絳趁流波
積徑穿巖依悴草此聲不受王侯憐此聲不向華筵攪
錦帳香濃總不期蕭蕭戚戚閒庭掃英雄帝子尙哀情
羈懷旅思何須道最有幽衷不忍聞驚魂咽夢心如搗
憶年十六伴秋歸巒紆峯遶碧成幃村羅金桂香籠谷

院列芳蘭馨染衣景好惜從人事改境荒誰惜菊英微
青春每怯涼飈起暮景何堪物候非所慰森森松柏林
梅爲素友竹爲隣凝霜載雪明姿態攬勝凭高仔細吟
看泉

雨歇風微靜流泉忽自吟新翻幽澗曲和就古松音苔
石浮秋潤蘋花漾碧陰高山誰共賞相對一橫琴

和悵悵詩

題從北平來未見原韻吳中山水涯正
所謂巴人止知下里故自助一笑

悵悵聯鑣卽計遊姑蘇臺望百花洲雲藏叻叻松間鹿
柳菴雙雙水面鷗景遇前踪疑是夢物因情解淡如秋
青天碧海猶生悔未必人間有莫愁

明妃曲和韻

回憶離親入禁時三千佳麗擅天姿黃龍府外關山月
曾照金門飲恨辭

出塞春光總化愁風笳霧角集邊愁陰山馬上琵琶怨
較勝長門賦白頭

湯文玉

字里無考

司嵒山

山雨初晴洗佛螺春風幾處揭青莎采香不倦溪邊路
多少飛紅趁襪羅

陳其年婦人集余嘗游宿遷北司嵒山有石刻女郎湯文玉游山詩云云詞極新雋然與他游詩雜書一石蓋他人為刻之非其自書也

陳娟

江蘇溧陽縣人

江上曉發題金山寺

楊子江邊一葉舟無邊勝槩此淹留烟籠塔影藏秋寺
雨帶砧聲入戍樓丹碧幾重環鐵甕銀濤萬頃結瓜洲
征帆便擬乘風去他日天涯憶舊遊

黃景蘭

字初馨浙江仁和縣人詩見德門壽言

姚母五十壽

旭日上簾額微風動綺筵黃菊馨且秀古松青可憐攜
將獻壽母餐之益延年

瞻彼泰華高俯視淮漢深巍巍並日月湯湯流古今悠
哉姚母德共此千秋心

徐賢

字省齋江蘇奉賢縣人廣文徐基之女適貢生

沈廸德著有續繡餘集

句

江山千里恨風雨一天愁

龍山客夜

春草有生色遊子無歸期

古別離

丹桂暗飄香遶月碧梧亂落影翻風

秋深獨夜

奉賢縣志徐賢字省齋廣文徐基幼女南橋人也
母張汝傳工詩賢得其傳自幼善吟咏長適貢生
沈廸德字恂夏為文恪公孫亦嫺韻事夫婦相偕
和篇什頗多其龍山客夜云云古別離云云咏燭
云云秋深獨夜云云諸聯並佳初汝傳有
詩名繡餘集賢繼之詩遂名續繡餘集

孔少娥

字文淑廣東歸善縣人適劉少唐

西湖

西湖西子兩相儔湖面偏宜點翠洲一段芳華描不得
月灣宛轉似眉頭

居易錄惠州西湖志載閨秀孔少娥絕句云云少娥字文淑歸善人歸士人劉少唐

徐氏

江蘇松江人

絕句

仰視天無星俯視月如霜月正人影短月斜人影長

隨園詩話松江有徐媛者十峰先生之女黃石牧太史述其續繡餘集一絕云云其母張夫人能詩所云續繡餘者以母夫人先有此集名也

擷芳集卷之十八終

擷芳集卷之十九目錄

才媛詩

古歛訥菴汪啟淑選

曹我聞 三首

李氏 一首

張采芣 四首

張采茵 三首

張成珠 二首

蔡琬 五首

桂彩霞 一首

鄭莊簪 一首

金法筵 八首

吳氏 六首

金瑞雲 二首

韓佩 一首

韓宛 二首

葉文嬾 十二首

顧奴 一首

巢麟徵 二首

方瑛 一首

錢敬淑 一首

徐範 一首

曹壽奴 一首

申蕙 四首

楊阿緡 句

紀瓊 十二首

擷芳集卷之十九

古歛訥蒼汪啟淑選

曹我聞

江蘇江陰縣人適丹徒縣文學張譽星

病中歸潤州有感

病容憔悴自堪傷
簾幙初開解客裝
身似孤雲曾出岫
命如秋草恐經霜
天涯已絕糟糠念
膝下空牽兒女腸
幸喜歸來存四壁
縱教懸磬勝他鄉

咏雪

彤雲四起雪交加
嶺上籬邊一色花
舞去豈如春絮暖

集時偏起晚風斜碎敲白玉明書幌亂散珍珠響碧紗
多事庭前小兒女學拈詩句手頻叉

雪霽

凍雀喧喧報曉晴朝曦紅影上窗橫深林風定梅花瘦
老屋寒添紙帳清吟客未歸驢背遠旅人初發馬啼輕
竭來小閣閑憑眺依舊青山繞故城

李氏

劉樞之室著有雲錦樓詩

陳其年婦人集穎水劉公敵比部名體仁寄王
推官家集數種中有賢媛詩三卷一名雲錦樓
詩係進士劉樞妻李氏著李氏中丞某女孫一
名初蘭軒進士劉佐臨女著一名寶田堂詩秀

才劉振女俱可誦汝穎風流卯金

為最孝威諸妹有天人譽矣

居易錄穎川劉氏閨閣皆知書同年公敵吏部

往為子述其女姪名第五幼工詩兼能古文從

姪搢妻李氏亦工詩子壬子使蜀時搢令洪洞

李以詩卷來相質今歿矣第五之女姪名令佑

嫁為公敵甥寧擢益賢子婦今年才二十詩詞

書迹以至金石篆刻皆臻妙何巾幗之多才也

嘗為予刻二小印

歛云穎川女士

偶成

花前閒步數蜂鬚霽色初晴小院隅巧試金釵移日影

闌干劃處損紅朱

張采芩

江蘇丹徒縣人張譽星之長女也適同邑文學

高元

中秋與諸妹艾納亭翫月

多時抱病卧深閨且喜今宵手共攜芳徑草衰蟲語切
碧天雲靜雁行齊吟成新句茶初熟話到殘更月漸低
清露濕衣渾未覺怪他花影過窻西

瓶花

隔簾聞鳥語欹枕看瓶花病骨何時健春光去已賒

讀道書

繡帙霜毫久不拈年來多病學參元何時九轉爐中月
碧海青天夜夜圓

重陽夜月偶感

登高已自負新晴萬里秋光月倍明貧過當年陶處士
更無籬菊可餐英

張采莖

采芣之妹適荆溪縣乙丑進士儲兆豐著有松

陰閣吟稿

艾納亭古松歌

眼前突兀見髯叟屹立庭隅獨叉手又如大壑潛虬龍
之而爪鬣寒冰封歲華閱歷見根底俯視羣材無與齒
長將一片碧空雲化作清陰覆亭子孤亭靜夜如深山

寒濤飛籟相潺湲風聲雨聲聽不辨時有老鶴盤空還
嚴陵灘望釣臺

極目桐江上高臺枕碧流乾坤傳一客蓑笠自千秋芳
樹閒中老孤雲望裏收歲時誰俎豆崖下有漁舟

中秋艾衲亭翫月和伯姊韻

良宵樂事屬幽閨茗椀爐香恰共攜雲影散空如水拭

月輪當午與樓齊却憐病骨還妨倦

時姐方病起

戲較詩名

不厭低寂寂閑亭情話久碧玲聲在畫簷西

張成珠

采芣之妹適長洲縣已卯舉人韓襲祥

中秋艾衲亭翫月和伯姊韻

空庭月色映中閨佳節欣逢手共攜靜夜露零衫袂冷
隔牆風送管絃齊閑憑曲檻清吟愜小立迴廊絮語低
凝睇忽驚秋思觸一行征雁過樓西

哭伯姊

拈毫慣傲簪花格叉手曾爲咏絮篇付與多才寧福分
賦成薄命豈良緣扶牀嬌女空牽恨掛壁遺琴絕撫絃
痛我雁行遭首折蕙幃月冷淚如泉

蔡琬

字季玉遼陽人綏遠將軍毓榮女高文良公其

倬繼室 誥封一品夫人著有蘊真軒小草

張裕萃蘊真軒詩序余壯而客吳楚間與當世
士大夫游輒耳熟高文良公學術經濟名重封
疆蔡夫人以富貴中閨媛幼喜讀書有過人之
識而亦閒及吟詠不以示人比雖聞之而莫得
窺其崖畧也自入翰林官京師時文良公已捐
館夫人老而棲居不數年卒見其嗣君繼亭昆
弟述其先夫人之淑德懿範余始備知其詳既
又讀其詩工雅和利因而知夫人不必以詩名
而人之推重敬服者特餘事耳蓋夫人生於世
族其始育也有玉女投懷之兆長而歸文良公
及文良秉節鉞旌麾臨莅之地皆名山大川魚
軒所至幾半天下而夫人事姑以孝相夫以恭
訓子以嚴御眾以和至於身處崇高動循禮法
友愛存恤之誼不以順逆易其心有古丈夫之
風焉暇時偶拈筆墨聊以抒寫性靈子姪輩一
時皆列顯宦夫人守不出閫之義尤篤故生平
所著罕有知者今其姪孫丰木性耽書卷寄老
煙霞將刊其詩以傳而請序於余余故表夫人

之大端俾讀夫人之詩者當求其性情行

誼之所在區區文字奚足為夫人重哉
高永名蔡太夫人傳太夫人姓蔡氏遼陽舊族
綏遠將軍諱毓榮公女也生有淑德才識過人
比長好讀書撫琴尤工詩律文良公與太夫人
從兄諱珽公為同年友前太夫人卒文良公稔
悉太夫人之家世閨範聘為繼室太夫人于歸
事始以孝相夫以賢教子有方御下有法文良
公由翰林視學山西遂撫西粵督滇黔歷閩越
吳楚垂二十年太夫人綜理內政諸凡區畫得
宜暇時常與文良公分韻倡酬為室中文學益
友於時名隨侍左右朝夕受教良多後文良公
卒太夫人親視含殮經營喪葬哀毀盡禮兒孫
婚嫁事畢太夫人亦旋以疾終平生孝友性成
如割股奉姑惠養族人其大端細目詳載行述
墓誌中均可毋須再敘惟是太夫人寢疾時長
叔早歿二四兩叔皆遠宦秦蜀獨石堂叔攜名
日在太夫人膝下進事湯藥太夫人疾革囑曰
余素有蘊真詩草風雨晦明之咏不足垂示子
孫汝輩不必存之以文藻虛名為事泊一旦溘

逝石堂叔廬於墓側每見太夫人之手澤輒咽
鳴流涕悲思難置因念太夫人一生識見學術
具在篇章不忍湮沒無傳方欲校刊尋以病殂
而止既而諸叔輩又前後相繼捐館茲婚母以
名年齒稍長且素荷太夫人慈愛最深備述叔
之遺諭出太夫人著作兩卷命名較編次序付
之梨棗名用敢勉承前志請序於桐山張大司
成非欲存詩以故違太夫人囑也而太夫人之
識見學術誠有不忍令其湮沒者耳
國朝詩別裁集夫人無書不讀諳於政治文良
奏疏移檄等項每與商酌定稿閨中良友也詩
集無可覓於選本中錄
取四章皆擲地有聲者

送文淵大孫北歸

昔見汝幼時課讀日繼夜別來十經春蘊玉猶待價一
帆入五嶺兩載留官舍剪燭話疇昔故舊驚凋謝云何

喬嶽崇倏若江河下念汝富才華勗汝相慰藉芸櫝書
勸持金門策期射今忽辭我還歸省須稅駕孝思不可
違重負幸毋卸志力汝所饒歲月不我借奮發繩武心
黽勉曾孫稼行矣勿蹉跎送汝淚雙瀉

紅蘭曲

紅蘭委露幽香滅白頭留記青衫血剩息仍存不了因
餘情猶有蠡斯切鄭重彌留執手時殷勤付語爾應知
三間茅屋遮寒露一架殘書可課兒大義還當終所託
莫將愛索深纏縛無奈絲絲一寸腸千迴萬折終難脫
欲將片語寄重泉地迥天高那得傳聞說令威曾化鶴

歸來華表更何年痴情欲避如逃瘧惟有探禪是良葯
料無棺木待儂開只把衫襦含淚著生憎圓月對愁眠
不耐旁人說可憐白髮自悲青鏡裏釵梳懶檢擲金鈿
重幃深下無昏早捲簾怕見秋光好兀坐悶行底事難
肝摧心折誰能曉睡魔未遣復愁魔孤枕清燈夜若何
桐影滿階人寂寂空庭彷彿見君過顛倒衣裳喜相晤
五中柔碎愁難訴執手褰衣雙淚垂問君那得歸來路
歸來絮語意纏綿一瞬相逢倍惘然綆斷銀瓶三載恨
翻悲破鏡夢中圓一聲孤雁鳴天際殘魄驚回揮血涕
天上人間兩不知悠悠生死空悲殮生離死絕不由人

空裏游絲陌上塵弱質已枯同槁木寸心終自轉車輪
爲君碎却彈碁局拋擲香爐罷琴曲殘局應知無見期
急絃那更憂思促憂思輾轉復沉吟秋月春花總不禁
消殘咏絮吟風意剩有投淵化石心世事浮雲難把捉
人情更似楊花逐新浴安能不整衣濯纓何處分澄濁
曠曠終風一番新誰從爨下辨勞薪退筆不須重運腕
古音難媚世俗人書空鎮日徒言說止有寒螿共淒咽
漏轉銅龍夜漸長燒殘銀燭心猶熱病骨伶俜瘦影隨
星星白首苦低垂啼乾杜宇三更血不斷春蠶萬縷絲
弱絮依風化塵土藕花落盡蓮心苦烈士殉名慷慨悲

成仁取義難相侮不盡哀哀枕畔吟暮笳拍裏斷腸音
形銷骨化成虛寂留取丹誠貫古今

薄暮

薄暮涼颼靜蟾光影半明空廊蟲自語遠塞雁孤鳴脈
脈千重意悵悵萬里情鐘聲遙入耳愁聽寐難成

鐵鎖橋

結構飛梁蹟尙存薜碑遺字滿埃塵三垂鐵鎖晴虹掛
百疊江聲戰鼓沉細柳營空雲似幕霸陵原靜草如茵
臨風一灑孤兒淚不見題橋續後人

書後寄妹

細雨圍窗漏正遙短檠明滅逐魂消却憐孤客應無寐
萬里西風共寂寥

桂彩霞

江蘇南匯縣人

壽陳母林太君

瑞氣遙瞻嶽降神雙頰紫誥動坤元瑤池鶴進南山酒
玉洞猿擎北海樽德曜齊驅誇孟母福星聯萼煥龍門
香傳黃菊來相慶應借冰桃託負暄

鄭莊範

字予敬號 浙江蕭山縣人適同邑李兼汝

著有集

贈黃皆令西歸

欲窮名勝極扶桑爲棹蘭舟過越鄉
花鳥幽閑林下夢山川綺麗鏡中光
湘湖雲暗驚驪白北幹風高勸桂觴
明發吳門霜色滿應知離思共微茫

金法筵

江蘇吳縣人諸生金喟之季女適吳江沈六書
七歲能詩故喟詩有左家嬌女惜餘春之句于
歸後遂以惜春名其軒著有惜春軒稿

勗諸兒

人生少壯時旭日初升天金花浴滄海
照曜無中邊致身貴及早東隅豈遲延
惜陰計分寸千古稱聖賢逝者本如是
白駒况加鞭老大有傷悲誰爲挽百川

偶然作

灼灼庭前花春風鬪紅紫隨榮復隨謝
盛衰偶然爾草木豈無情誰能一
生死我思更如何欲種菩提子

新秋曉望

曉色遠迷濛秋陰不關雨連山薄霧中
丁丁響樵斧牆角蕉抽心井邊桐綴乳
卷簾一以眺靜裏生妙悟

長門怨

漸覺清宵永長門易入秋井牀桐葉落河漢露華流妾
願惟中道君恩許白頭不知憔悴盡別館自篋篋

觀雨

黯淡湖山雨氣連鶉鳩聲裏萬家煙直愁漠漠旁無地
不見高高上有天石勢趁雷移隔浦濤聲逐電落平田
凭闌萬慮捐除盡可似身居混沌先

送春

今日送春歸畢竟歸何處九十日春光隨來亦隨去

蘇臺懷古

綺羅人散故宮蕪送盡春風柳半枯欲問西施舊時事

城頭惟有暮棲烏

悼二姪女

貫華堂畔長青苔寂守孀閨扇不開梁燕舊時曾作伴
不勝哀怨一飛來

吳氏

號清華散人

悼亡女徐食霞

朔雲結慘悽廣陵濤怒立閨中一翬笄親知盡心盡我
眼日加昏我氣時填塞悲哀匝月餘與汝爭一息
夜深頻入夢宛然舊顏色執手媿媿言醒來猶記憶汝

夢今已完我夢何時畢一燈光熒熒萬感攪胸臆
年年設悅辰歛謳悅耳目今夕云何爲哀聲撼山谷修
短固有命毋乃太迫促汝聲不復來何以慰熒獨

漢亭二兄來邗話舊誌感

蓬萊小閣叩真仙性若能參命自延西嶽靈桃還未實
東溟綠水已成田雁迷午夜鄉心斷風颭秋燈隻影憐
空谷忽來雙竹杖老年歡聚話從前
心跡雙清卽澗阿誅茅不向白雲窩眼前花月勤參究
腹裏陰陽費琢磨芝圃鋤成黍米熟蒲團習靜妙香多
休教鶴羽飛蓬鬢挽住春光莫放過

瓶梅

孤山分取一枝殘鐵骨離奇耐歲寒雖貯玉瓶難結實
清香留與世人看

金瑞雲

山西太原縣人

鐵馬

珊珊應擬佩環輕清徹如聞秦女箏庭畔驚殘棲鳥夢
樓頭敲動玉關情高垂髣髴花鈴繫驟響依稀鐵騎行
占得一年風力健不知吹作幾番聲

春閨

門掩櫻桃近水濱青苔小徑淨無塵一庭花氣蒸香雨
半榻春風卧美人蝶去似憐幽夢斷燕來如話別愁新
連朝不敢開妝鏡淚臉難將粉絮勻

韓佩

字照玉浙江金華縣人著有鸞音集與妹湘烟
人稱雙璧

七夕

天上從教別思多東西相望意如何自應悔作牽牛婦
贏得年年一渡河

韓宛

字湘烟照玉女弟也八歲能讀離騷十二卽作
詩著有飲綠亭集

送燕

紅襟翠袖自蹁躑最愛雙飛畫閣前今日送君途路遠
春風相見又來年

七夕和姊

斜月涓涓掛玉鈎鵲橋仙子會牽牛雙星若使常相合
何用穿針上小樓

葉文孀

字淑菴江蘇長洲縣東洞庭人唐屏山之室也

著者有紡餘吟

七十二峯足徵集氏名文嬾字淑菴居東山之
白雉灣與梅語亭主人周夫人同宗也屋廬相
望意趣雅合每有著作賡唱疊和香韻流傳山
中風雅恒艷稱之屏山牽車遠出氏奉翁姑朝
夕惟謹女工之暇涉獵書史體素弱善病常誦
金經以祈永年病革作十辭詩以謝世岱心吳
世章時典稱其從釋教中
來塵緣了了無此子粘滯

記夢

碧天皎皎彩雲飛月殿天香散四維昨夜夢乘青鳥去
瑤池西畔謁仙姬
琳宮紫府任逍遙靈草奇葩遍地饒心願老姑長壽考
五雲深處覓蟠桃

十辭詩

一辭蘭室并中堂上有慈姑心切傷莫盡孝思終抱恨
一棺未蓋獨傍徨
二辭老母暨諸親抱德如山報未伸若使不才成短命
遙空默佑福終身
三辭錦帳共銀屏寒暑相依隱病身非是薄情輕別去
風搖花散不由人
四辭梳具暨菱花若待新妝事恐賒漫說再生臨曉閣
舒眉重對舊清華
五辭文具與花牋彩筆攄懷每灑然今日斷腸題斷句

自憐黃土掩青年

六辭玉葉並金錢姊妹歡呼賭勝先玩月臺前如少我

風流早續別嬋娟

七辭彩帛並金針補綴年年念苦辛痛殺兒曹今失母

蘆花難免後加身

八辭書笥與箱籠已是年來漸覺空助得兒夫能創業

飄然兩袖返天風

九辭木石共書齋几案文房手自排倘屬梅花思故主

風清月白我神來

十辭六賊并皮囊病到沉危苦莫當欲覓仙山雲路杳

靈臺原自有西方

顧妣

字啟姬浙江錢塘縣人顧籬雲之次女也適鄂

幼輿著有靜御堂集由拳草堂翠園集予插架

向有之為祝融奪去俟另覓得補選入焉

句

花憐昨夜雨茶憶故山泉

綿津詩鈔錢塘顧啟姬鄂子幼輿室人也曩于京師有句云云一時艷稱之

予本淡蕩人讀書不求解爾雅讀不熟螿蟻誤為蟹

池北偶談顧妣字啟姬杭州人適鄂生某康熙庚申從其夫至京師嘗見所著靜御堂集小賦詩詞

頗婉麗九日子與同人飲宋子招工部小園限蟹
字韻翌日鄂詩先就顧代作也其云云予驚歎顧
善歌所製詞曲有一輪月照
一雙人面之句子最賞之

巢麟徵

字淑只江蘇武進縣人巢震林之女也適文學

黃初子琴瑟倡酬人爭艷之

春閨曉起

片月獨愁花影細靜來香院半留春清缸小裊燈苞剩
墜露初抽蕙畝新城樹遠聞鶯喚早石苔多為鹿眠馴
晴烟曉起纔殘夢好黛雙描拭墨勻

歸舟卽景

兩隄烟柳碧于紗中夾茅扉三兩家數點睡鳥飛不去
月明溪漲白蘆花

方瑛

字眉士浙江錢塘縣人

春怨

一夜梨花落滿池西風空自惜殘枝消魂怕向樓頭立
况是斜陽欲暮時

錢敬淑

字師令江蘇江寧縣人談允謙之室也

泊浦子口

殘年泊歸棹問酒郭西亭雪圃芹芽白江醪竹葉青夕陽新別路衰草古離情隔岸寒山色含悽望舊京

徐範

浙江秀水縣人善小楷

詠蟬

高柯嘒嘒日西斜清畏人知敢自誇孤潔素懷惟飲露螳螂毒手底相加

曹壽奴

小字山姑生於明國初尚存著有觀靜齋稿

贈伯姊

草有竝蒂花木有連理枝果有合歡核豆有同根其魚或比目遊鳥亦比翼隨同功繭作綿合綵玉爲卮我與子姊妹願得不相離出必同車輪居必聯屋楣見月每共拜弄珠定雙嬉子妝我掠鬢子盟我捧匱我衣搗子砧子濯汗我私機張我續織鏡聽子兼持子褰我衾裯我舖子粥糜寒輒擁子背暑還扇我肌子女迭相抱帷帳恒並施生從比肩人歿以百歲期

申蕙

字蘭芳江蘇長洲縣人申胤榮之女適秀水沈姓著有縫雲閣集

秀水縣志申蕙字蘭芳于歸沈氏草書法孫過庭詩蒼老不作閨閣中語有縫雲閣集與歸叔芬齊名世稱二雲閣詩草云

鴛湖暮泛

雨過收殘照湖光起暮煙鷺鷗隨浪汎蘋蓼任風牽漁火明還暗烏啼斷若連歸來閣尙掩皓月樹頭懸

林屋洞

龍洞雲封處千山路半迷常年人不到終日鳥空啼石泐蒼苔護瀑懸晴雪低有懷探玉簡一傍隔凡棲

秋日登屏山

樹密影重重秋聲萬壑同不知山上月剛到竹林東

春睡

深院迴廊鎖綠楊閨中午睡夢初長只嫌春懶慵鍼線燕落香泥汚繡牀

楊阿緡

陝西潼關縣人大令楊迂谷鸞之女也

句

月明夜打魚

瀟湘聽雨錄迂谷有女阿緡從宦醴陵時甫六歲於湘江舟中嘗口占云云迂谷賞之以爲有詩情因課以詩頗嫻吟咏蔗畦爲作小印題云迂谷愛女屬爲作名印偶爾落筆乃入醜拙一路豈拈出山石句爲女郎詩增長氣格耶

紀瓊

字蘊玉湖北漢陽縣人司城陳鶴汀繼室 誥

封宜人著有繡餘草

陳鶴汀紀宜人小傳略宜人紀姓幼聰慧八歲
吳孺人口授孝經女史輒成誦長通文義二十
歸余繼室逮事先君事無巨細皆致誠謹李宜
人遺子訓鞠之無異已出處如姻諸姑和好春
秋享祀酒漿滌滌豐潔性淡泊從余游宦南北
未嘗私一綺羅釵釧金玉器飾皆非所尚生子
三宜人諱瓊字蘊玉初封孺人晉階
宜人年七十以壽終著有繡餘草
孫陳蘇繡餘草序略繡餘草吾先王母紀宜人
所作也先王母性愛書史口吟手披自少至老
無間尤愛陶柳王孟諸集日夕不去手故五言
古近體尤得冲澹渾穆之旨蘇生也晚不及侍
先王母膝下時聆訓誨而生平懿行自先王父
所作傳外間得一二軼事於先慈汪太君謹附

誌之吾邑中某氏其婦家顯宦也婦歿而偽撰
詩集欲媚婦之父母祈先王父介先王母校讐
先王母曰此欺世盜名事得母玷吾名乎先王
父曰此亦樂與人為善之意何害固強之終不
許嘗獨坐堂上見一婢有所挾逡巡中門外不
進先王母即趨入先慈室先慈愕然迎曰姑來
何急先王母曰外廂碾米一婢自外來負重窺
探必有所竊故避之先慈曰米失幾何若廉得其
避之何也先王母曰米失幾何若廉得其實彼
終身難為人矣且既隱其事焉用識其人吾家
忠厚世傳汝輩不可不體此意也因為詩歌四
章蘇退筆之於書由今思之先王母德行學識
純粹淵深夫豈恒人所能及本此以發為詩歌
故沉鬱而真至所謂仁義之人其言藹如也

訓媳

我聞仁厚齊家之樞小人多怨其可深誅昔賢有言水

清無魚

我坐中堂婢來庭曲負重竊窺逡巡其足我不避之進
退維谷

相彼小人寧晰禮義懼罪包羞貪茲小利我如核之終
身是愧

松栢之下可以息陰察察爲明福豈來臨告我後人勿
替仁心

送別吳老夫子

卽大舅父

柳絮繞離思楊花愁行客杏壇酒初罷江城日將夕嗟
我愚蒙資十年侍講席雖愧古名媛薰陶時有獲今當
返故里何時復請益况兼涓陽情憂傷何以釋

端陽日作

改序欣晝長佳辰泛華卮熏風吹榴樹花影紅參差兒
女各年長繞膝今在茲顧視誠足樂開軒賦新詩

春夜草堂聽沈大姑琴

春烟暮靄天欲暝東南月上烟低凝月光照我園中樹
枝影斜覆池西亭亭中有客發清興高張紫瓊牕前鳴
調絃宛轉漸入調抑揚頓挫長短清潺潺澗水石罅溜
冥冥松濤萬壑傾初彈能使庭鶴舞再彈不覺林風生
意深思遠非凡響聞之令我中心平萬籟蕭然此俱寂
但見白露飛泠泠

感春

朝來鶯語滑臨鏡歛愁蛾白髮不堪理青春奈爾何已
看寒食近漸覺落花多回首流年疾真如一擲梭

重陽後一日作

節過重陽冷情牽別緒長愁來驚落葉老去戀秋光白
蝶蕭蕭過黃花澹澹香倚欄還獨坐誰信九迴腸

新秋夜作

雨洗秋容暑氣藏暫拋團扇坐藤牀柳邊月上飛輕靄
竹裏風清送小涼螢火暗流閒院靜水禽雙泛露荷香
七絲鼓罷更闌寂桐樹移陰過北堂

詠竹

風來笑有聲雨過淨如洗有時明月來弄影高窻裏
嫋嫋復嫋嫋隨風東西吹但見宛轉態貞心誰得知

過螭磯謁孫夫人祠

陸遜虜亭敗蜀兵玉顏西望恨難勝應知絕命江頭日
悔聽虛言到秣陵

擷芳集卷之十九終

擷芳集卷之二十目錄

才媛詩

古歙詠菴汪啟淑選

陳箋 一首

王莉枝 句

杜璫 四首

左如芬 八首

王氏 二首

程瑜秀 三首

吳氏 一首

沈德禎 三首

張氏 二首

余性淳 六首

葉氏 二首

陳士更 一首

陳士安 一首

陳士興 一首

查惜 六首

王德嘉 三首

張氏 句

王兆淑 二首

張瑩 二首

王令聞 三首

時嫻 四首

雷健兒 四首

雷阿淳 二首

雷順倩 四首

蔣操

首十二

馬希賢

一首

丁白

二首

司馬采

二首

呂氏

一首

擷芳集卷之二十

古歙初菴汪啟淑選

陳箋

江蘇高郵州人

落梅和韻

風敲簷鐵雨聲殘更道梅花落畫欄夢冷衡門新竹徑
神傷水部舊詞壇翻飛應與人爭瘦懊惱難憑笛訴寒
縱到飄零豈須怨冰心留待後來看

王菊枝

廣東人也

句

與孤窻雨一般聽

陳其年婦人集王荊枝工小詩雋冷殊甚廣東程內史名可則爲余說洵可爲珠孃之絕調矣

杜 璉

字佩玉號浣雲江蘇太倉州人福建永春州知州杜昌丁女適吳縣監生范志著有竹雲樓草

溪上觀魚和外韻

神龍巨鯤橫滄溟噴雲吹浪揚其靈飛潛騰躍不可測
怒濤震蕩連青冥逍遙海運忘其大性得情安與化會
動則山傾靜岳峙茫茫萬頃隨沾旬凡物有分亦有時

修儵出水光參差香萍碧藻春意暖飛絮落花春景遲
淺渚可潛亦可躍得遂天機有餘樂侈思難忘分減恩
相羊聊借餘波托隨羣逐隊共相安縱逸何知江海寬
已免蹄涔乞河伯不貪香餌避漁竿鼓沫煦波堪假息
千里風濤寄咫尺禹門變化且須時川澤容身養潛德

晚坐耕雲軒

點筆石欄前虛亭野色連境幽閑獨會詩淡愛誰傳蕉
葉綠如拭桐花香可憐日斜風瑟瑟秋意已蕭然

雨夜懷三妹雪林

短檠孤照數更籌急雨和風暗入樓遠道懷人空對影

十年多病不勝愁涼生枕簟難成夢聲到梧桐易感秋
起坐無聊眠未穩沉沉一夜滴階頭

寄衣曲

挾纊君恩重裝綿妾意紛恐添關塞恨不敢寄迴文

左如芬

字信芳安徽桐城縣人順治乙酉舉人鶴巖之

仲女適進士姚非菴幼聰慧過人讀唐詩千餘

首背誦不忘年甫三十而卒著有纈芷閣詩稿

龍眠風雅左如芬字信芳郡丞鶴巖公之仲女
進士姚非菴之妻也幼聰慧過人讀唐詩千餘

首背誦不忘年十三歸非菴太夫人方操家秉
肅秩之外益得研求書史因從非菴學詩出口

便有林下風味蘭閨倡和幾無虛日迨非菴成
進士謁選得浙之江山單騎之官不能挈家累
憂鬱成疾甫及三十而歿所著有纈芷閣詩稿
非菴爲之授梓而屬其世父眠樵先生序之

納涼

向晚深閨靜流螢遶檻飛竹搖窻影亂花落樹陰稀帶
露風初動移雲月漸輝欲眠愁未穩爐裊麝香微

初夏

忽忽薰風度韶華病裏過不知春色盡但見落花多拈
韻消長日看書醒睡魔晚涼新月上清影照藤蘿

秋夜憶夫子

送君纔匝月秋色又將闌不覺流光易偏憐久別難夢

隨江水遠寒念客衣單良會知何日離情已百端

庚子七夕夫子應舉江寧詩以贈別

清江風靜浪初平身逐孤帆一葉輕天上恰當懽聚日
人間偏有別離情蛩吟幽砌闌心碎月落寒汀旅夢驚
爲囑天門須射榜桂花香處好逢迎

菊月夫子北上詩以言別

強疊征裘淚暗垂秋風瑟瑟又將離曉天霜月常隨馬
晚岫烟霞盡入詩野店聞砧驚客夢荒庭落葉動人悲
欲知別後思君處小閣殘燈夜雨時

咏柳

帶雨拖烟拂小樓枝枝搖曳動人愁柔條縱有絲千縷
不向江頭挽客舟

暮春卽事

紙閣香銷午夢殘起來無力倚闌干桃花飄盡鶯聲老
零落春光不忍看

秋夜夫子赴芸圃酌酣飲達旦

靜掩紗窗避晚涼挑燈獨坐夜偏長無情最是初生月
不待人歸上短牆

王氏

浙江德清縣人陳尚古女也著有止一齋集

碧浪湖

浮玉雲根出寒塘水自流空山聞獨鳥落日見清秋天
際孤帆動松間一磬幽親知何日見定向此中遊

早梅

微霰凌寒下梅花及早春孤榮盤野徑玉質淨芳晨疎
蕊淡何艷高花韻益新我生歷冰雪見汝得余真

程瑜秀

安徽歙縣人文學王宜邨室

雨中看白蓮花

冰肌玉骨影婆娑清艷堪邀帝子過爲愛淨根宜淨水

敢同諸女唱蓮歌

清姿自合伴清湘不耐尋常紅粉妝雨過池塘新出浴
臨風何處不生香

桃花雪

嫣然醉笑太真妃妒惹寒花六出飛可是東皇裝點巧
水晶屏外絳綃衣

吳氏

江蘇元和縣人

己亥歲朝

春和雪絮到天涯粧點池臺瑞氣加藍尾尙堪傾竹葉

紅顏爭欲頌椒花東風漸轉銀瓶小曉色餘寒翠幙遮
人羨今朝新景好我憐去故獨興嗟

沈德禎

字仁英直隸柏鄉縣人也

九月十三日晚閒步階除仰觀銀漢月色皎然感
別而作

耿耿銀河天氣晴桂輪斜照碧窻明風吹翠竹頻翻影
蛾滅昏燈巧弄情落日孤雲人去意殘更永夜雁歸聲
閑階佇立真無那欲寐應愁夢不成

寄外

長河半沒鴈飛時默對南征寄所思欲倩麝煤書一語
正當腸斷讀君詩
月暗西隅漸欲收不曾愁處也知愁流螢似解予幽寂
却趁風吹上小樓

張氏

浙江嘉善縣人詩見俞琰詠物詩選

暢春園卽景

蒼茫山色映新晴紫氣遙瞻識鳳城兩岸垂楊高閣蔭
一灣流水小橋橫湘簾日轉花陰細翠幙風柔燕語輕
卽此便非塵世界三山何必訪蓬瀛

西府海棠

似笑如顰百媚生
臨風映日態輕盈
西施舞罷添朝倦
妃子扶來帶宿醒
開處自堪誇絕世
落時誰不羨傾城
雖然一種天香少
子美無詩亦寡情

余性淳

字靜昭奉天人

寄征夫衣

紙牕風過鳴如吼
新涼清透羅衣袖
踟躕忽憶征夫寒
整衣淚湧難成就
幾番欲剪又尋思
腰圍可得還依舊
叮嚀遠寄向邊庭
製袍人比黃花瘦

夏景

深深庭院日初長
獻水芙蓉吐異香
簾捲玉鈎朝雨散
簟鋪湘水午風涼
竹搖清影初辭籜
燕引新雛故繞梁
靜坐書窻無一事
瑤琴三弄已斜陽

秋夜

燭暗蘭閨夜氣清
長天遙聽鴈飛鳴
城頭畫角隨風至
庭外霜華襯月明
葉落井梧秋有韻
露滋籬菊濕無聲
沉沉寒沁梅花幙
漏滴愁心夢未成

宮怨

微微風送上陽鐘
昨夜輕寒睡未濃
鸚鵡不知人意懶

聲聲偏喚整花容
樓閣崔嵬烟霧中
顰眉寄語怨東風
羊車有路皆芳草
却在昭陽第幾宮
無奈春風送夕暉
侵階芳草更萋萋
回看梁畔呢喃燕
故向幽庭竝翼棲

葉氏

江蘇長洲縣東山人詩見七十二峯足徵集

沙嶺觀雪

積素杳無際
同雲不作陰
萬峯光晶晶
千樹玉森森
瑤島平生願
冰壺一片心
月明應更好
只恐暮寒深

紅梅

瞥見南枝雨綻肥
巡簷索笑落霞飛
賞花未醉花先醉
天遣紅兒媵玉妃

陳士更

字學恭安徽天長縣人也適李某

江南通志陳士更天長人教授以剛女侍父讀
書卽解學字及詩文卽工後贅婿李於池州學
署母病奉湯藥八年不少怠母卒代秉家政父
善病又悼亡恒鬱鬱女輒引故事或爲小詩以
解之卒年三十

黃之雋墓銘天長陳燭門愛其女而悲其死哭
以詩告以唐堂許銘其墓遂來告曰礮石須矣
燭門與予先後出孝感屠公門稱同門兄弟是
宜銘女名士更字學恭隨父任池州府教授工

詩精書法能作制藝凡燭門之所蜚聲揚光挾
持以領袖士林者盡傳其女匪傳之也女慧遂
盡得其不傳者也是故燭門欲不愛不能也并
而贅壻李生於池署辭父母有日矣而母病則
日侍湯藥夜疏天求代者凡八年而母死則代
母秉家政燭門之家兄弟子婦皆依以居食
指衆而宦極貧女一切措辦當父意忘其貧燭
門善病窮愁悼亡則時時引說故事咏新詩以
釋父憂於是燭門愈不能一日離其女女愈不
能一日離其父以至於死則燭門愈傷其女已
嫁而以已故俾不得以婦道表見於李遂溘焉
以終於室也死之日燭門修志客金陵則愈傷
其女三十年相依以生而不見其一朝之相訣
以死也是故燭門欲不悲愈不能也燭門之友
荆溪任太史昭文陳進士桐
城張孝廉爲易名曰懿孝

五妹亡後一夕家大人夢其作詩一首覺後命予
偕諸妹次韻

荒祠人散閉棺初棺殯於水府祠短燭熒熒照暗廬風旋紙錢
圍壞砌烟熏塵網落殘書侍兒搵淚焚香至乳媪傷心
問疾餘最苦生前多少恨夢中猶覺語言疎

陳士安

字學莊士更妹也

前題和韻

把袂殷勤入夢初喃喃相送出幽廬花陰忽變風鈴語
塵跡空留鳥篆書月耿斷魂猶未沒燭拋殘淚已無餘
隔窻髣髴聞行跡一徑陰森暗柳疎

陳士興

字學純士安妹也

前題和韻

黃昏人靜暮寒初不見歸來入故廬月姊肯隨泉路客
封姨應送夜臺書墨痕在壁臨池後線纈粘衣刺繡餘
一度思君一惆悵那堪梧柳夢蕭疎

查惜

字淑英浙江海寧州人馬思贊婦也著有南樓

吟香集

海寧縣志字淑英幼聰慧偶從父西毋步月有
輪月自明閨人自愁之句年十五歸馬思贊家
有道古樓藏書最富因縱觀唐宋以來詩文深
閨唱和以清雅為宗有吟香集六卷自為序

見山樓墨話海寧州挿花山人查惜字淑英馬
思贊之室也思贊居龍山家有道古樓藏書頗
富日與淑英坐樓中爐香茗盃丹黃校讐頗有
趙明誠李易安之風韻淑英著有南樓吟香集
卷六

呈家仲安

周鼎浮洛水龍劍出豐城寶氣不終沒人懷萬古情不
如乘騏驥不如駕長鯨行游向京洛高望凌蓬瀛茂先
勵素志終軍請長纓修能繼內美特達宏家聲

人言夫婿殊夫婿殊文章冥思出天地抽筆開洪荒高
舉振六翮梧桐棲鳳凰德輝被天下不與燕雀翔繇來
三都賦紙價貴洛陽

行路難

行路難不在羊腸之屈曲蜀道之巔崿行路難不在三峽之逆流十八之長灘康莊途生荆棘順水舟多狂瀾世人只知設險之爲險誰知至險乃在平與安濁酒頻頻進焦琴續續彈賤妾歌一曲爲君竟日歡君不見聰明反被聰明誤知雄守雌天下寬

乞晴

天高億萬丈晴豈乞能來曠朗無時見陰霾幾日開緣之悟世道兼以得心裁立志誠須早無爲後世哀

春望

一望頻爲物候驚高樓凭處思盈盈鶯非選樹間關轉花亦乘春歷亂明綠水漲來艇子疾青山踏去馬蹄輕傷心偏是王孫路芳艸萋萋遠更生

二月

二月江南地風光處處春誰家妖艷女遮面看行人

王德嘉

字家令江蘇武進縣人

春恨

寂寂無聊簾半鈎綠肥紅艷映層樓鶯藏翠色迷春恨蝶趁花疎惹暗愁幾度停毫思去夢一番花褪意如秋

輕紅片片隨春去總抱閒情付水流

山意

翠壑映山濃高峯古寺鐘不聞人語響惟有落花風

秋溪坐月

翠壑層層映碧空一池秋色浸芙蓉清溪坐月遲歸步
睡意應知怯晚風

張氏

孟亮揆翰林之配也

句

落落秋風班女扇團團明月竇家機

在園雜志孟翰林端士亮揆先聘張守戎之女張官雲南兵戈阻隔音問不通及孟貴結婚世族未期年滇省蕩平先聘復至不能却謝乃分宅而居張美而端善文翰尤工詩世族之女祖父兄弟皆貴顯孟厚世族而薄單寒張氏所居屢月僅一至焉張賦秋閨怨八首內云云其詩徧傳孟不少悔忽傳旨孟亮揆行止不端着革職一時快之

王兆淑

字仙琬江蘇通州人

秋柳和韻

春來眉展試羅衣過眼繁華今又非吳苑笙歌愁月盡
隋隄花草怨人稀風吹荒岸流螢墮葉落村墟黃蝶飛
片影涼光秋欲滴賞心如夢肯相違

夕陽疎影使人憐殘恨西風冷碧烟彭澤舉杯初漉帽
秦川罷織欲縫綿營中畫角思歸日馬上章臺憶昔年
最是悲涼成九辨鴟鷄啁晰寂寥邊

冒丹書婦人集補王兆淑字仙琬通州人亦和秋
柳詩云云二詩殊濯濯有致

張瑩

安徽桐城縣人適方合山著有友閣詩集

暮春遊王夫人園林

芳郊春欲暮偶爾過柴關路曲都因竹亭高喜就山一
橋穿樹出雙鶴引雛閒鎮日林泉趣塵囂忘世間

壬子春日感懷

小園狼藉暮春闌微雨輕風尚薄寒遠信望過三月盡
空懷怕見百花殘世情半在愁中悟俗累多因病後寬
幸有圖書堆滿架閒來取次一開看

王令聞

字鳴岡江蘇華亭縣人主聲聞之妹也適何鶴
延著有雪香齋詩

蓮花

芙蓉高潔水爲鄉特立亭亭異衆芳翠蓋朝承仙掌露
朱華時發令君香風飄紅膩浮溪浪雨浥青涼散草堂
搖曳隔簾渾欲語美人彷彿在瀟湘

昭君怨

白鶴黃沙萬里秋
琵琶未抱淚先流
曲中不解關山月
猶作深宮院裏愁

秋夜話別

露下蛩吟秋氣清
芙蓉欲吐尚含情
總然未有刀環約
暫逐飛蓬對月明

時嫺

字宜幽江蘇常熟縣人
給諫時敏之女也適顧
揆有

次張蕙琬四時閨咏韻

九十春光一夢中
半晴天氣晚來融
淡粧不用臙脂染
夾岸桃花映面紅

清涼無暑扇輕紗
小汎扁舟岸影斜
蓮浦風生香夢淺
月明照醒一池花

小砌梧桐落葉殘
早傳涼信覺衣單
蛩聲逼枕難成寐
剔盡銀燈夜正寒

故園搖落鴈鴻思
又值天寒歲暮時
閨閣不知風雪冷
却嫌梅柳報春遲

雷健兒

字芳柔河南輝縣人
自注云本姓姜蘇門隱者

之女也與其妹阿淳順倩皆能詩著有聯香小

草

賦得雨後有人耕綠野

春雨知時節田家重耦畊一犁芳草亂千點杏花明密
樹呼鳩返高原叱犢行雲殘山近遠地闢畝縱橫蚓出
鴉爭聚人歌盃自迎三推聞盛典躬稼九圍清

聞蛙聲戲題

水村羣吠稻涼天不論官私亦可憐底事幽閑煩鼓吹
騷人牕下正高眠
不離汙泥與水涯濡須鬪艦漫相誇當年誰使荆尸者

戰氣軍中百倍加

池塘草滿雨初晴抱子跳泥閣閣驚絲竹從來吾畏解

此聲無解不妨鳴

弄閑餘墨壬午春薄游武林闕五月乃歸適吾鄉
有田姓者售易中州附余舟西上偶見其行篋中
攜有抄帙田曰此寓所鄰媪績篋中物偶落吾手
不知何語也某取視前有自叙言其父雅好山水
卜居蘇門兄弟兩人姊妹三人父皆授以詩法女
紅之暇間以吟咏自娛云云殘缺已過半字畫秀
媚卷中猶有脂粉浣痕疑是親筆
所繕寫也因驚喜為錄其尤者

雷阿淳

字妙柔健兒仲妹也

即事書呈家大人並示健姊小妹順倩

隱居豈無事耕鑿息其機適志在場圃何心論是非微
風稻花圻新雨土膏肥牀頭有斗酒相勞月臨扉

雷秋聲

來往響潛通疎林聽不窮砌蛩時共細溪杵遠難同
簌斜陽外蕭蕭落月中秋深桐影亂露重荻花空斷續
驚殘綠淒清舞冷紅且煩童子看未問大王風

雷順倩

字靜柔健兒季妹也

賦得霜葉紅於二月花

春花競豔漫相誇寒點臙脂艷更賒總是沾霜兼浥露
偏工映水與凌霞林間酒罷顏堪對葉上詩成錦未奢
雲白山青已奇絕夕陽還試爲停車
水碧汀寒照影賒煙巒似展翠屏遮春風祇長千林葉
霜力能勝二月花薄靄紛披青女帔頽陽爛漫赤城霞
一帆未脫吳江冷吟倦殷紅石逕斜

漁父詞

綠蓑雨細無相識鷗鷺雙雙閒對立浩落長歌落水中
鮫珠歷亂珊瑚泣

隔岸西風誰笑語黃蘆折葦團輕絮滿江烟雨看多時
白鳥成行忽飛去

蔣

字修端江蘇陽湖縣人著有秋雲草

幽琴歎

三首

吾欲將幽琴贈與千金客視茲守財虜誰知深憐惜謾
道枯桐枝可以輕棄擲千金安足論奈何欲相易珍重
莫浪投寧使塵埃沒不見入林鳥徘徊慎詳擇

吾欲將幽琴抱向侯門試由來希世珍入門衆所忌愛
多情不專中道輕相棄昔聞鼓琴人難得齊主意縱使
千萬彈古調與時異所以甘貧賤十年永不字

吾欲將幽琴贈與儒家子讀書多薄情不可同生死嗟
彼臨邛客相逢以綠綺何當白頭吟輕棄尚如此我有
千恨情寄向琴聲裏常恐俄頃間悞落輕薄士

悲遇

相對忽惆悵啣悲慘不歡回思十年事歷歷中艱難少
小無阿母陟屺空長嘆入戶猶傍皇不聞勸加餐繼遭
中原亂崎嶇不得安骨肉散亡盡鄉園亦摧殘北望多
旌旗何敢尙盤桓自憐深閨人流落河之干蓬室暫寧
居寸心聊自寬轉傷垂老父所悲形影單豈料繼母威
令人毛髮攢日入常苦飢歲晏長苦寒晨炊連夜織操
作力已殫伶俜但見骨肌膚無一完偷生若朝露聞者

亦心酸恐傷吾父心飲此長恨端繼母貪重貲千金帶
笑看雖然新粧束容顏非故丹嫁作商家婦終朝淚不
乾奮飛固所願恨無雙羽翰從此妾心死古井不生瀾
三月新婚別千里去邯鄲一去無還期塵生舊羅紈
轉看成敗長恐花闌刪人生會有時妾身何獨難慟哭
訴彼蒼夜夜夢更闌夢見畫樓中翩若一儒冠誰知忽
見契投若膠與鸞相逢白司馬重將琵琶彈一彈未終
曲愁絕摧心肝

寒雨

疎雨下黃昏酒窻時浙歷空林忽怒號風雨聲相擊高

閣若無依凜凜搖四壁殘燈不復明對此更慘感愁人
淚已盡猶作空階滴

送春有懷

去年離別如昨日昨日相逢已成昔夜半窻前疎雨過
朝來苔上沒行跡畫簾初捲來清風垂楊拂水搖新碧
乍晴乍雨釀輕寒芳草落花數點白此日懷人復送春
落花故惱懷人客春到人間花爛漫春歸何處花狼藉
悶倚青樽君不同斜陽欲暝愁春夕兩處相思不相見
惜春更是人堪惜

病起

不知春到久病起落梅深帶緩輕寒襲牕虛暝色侵清
樽今夜月歸夢十年心芳草情難負淒然淚滿襟

懷鄉

誰料深閨質飄零歷苦辛鶯花今日淚天地再生身烽
火驚初定艱危事更頻幾回思舊業北望總傷神

秋夜有懷

小樓人獨倚秋色杳蒼茫清露凝初白寒花落更香風
吹幽夢冷月傍旅魂涼夜靜秋偏好悠然憶故鄉

愁懷秋感

深閨寂寞倍離愁歲月遷移去莫留霜葉落時常閉戶

玉簫歇後不登樓驚魂縹渺難爲夢病骨支離易感秋
不待歌成芳草句傷心一雁淚先流

柳枝曲

交枝深鎖小紅樓弄雨欺烟不肯休只恐涼飈一夕至
瘦腰減盡舊風流

深籠烟雨淺籠鶯帶碧將青線未成莫道無情長送別
顛狂飛絮更無情

馬希賢

浙江仁和縣人馬柯亭女也適山陰馮軼羣

春夜

揚芳集 卷二
寂寂東風拂柳斜
漸看明月轉窻紗
蛙藏曲澗喧芳草
鳥宿繁枝夢落花

丁白

字素絲詩見張山來清淚痕集

挽吳少君

天生慧業不尋常
枉把新眉十樣妝
讀罷詠辭空有夢
何從更覓返魂香

空懸總帳阿誰親
哭到無聲似有神
堪怪鬚眉多薄命
半將青塚葬情人

司馬采

字于湘江蘇常熟縣人

和汪純翁姑蘇楊柳枝詞

樓頭楊柳漸交加
翠幙成陰雪作花
好鳥一雙啼不斷
始知春色屬兒家

偶下機來折一枝
可憐如縷復如絲
問人織得迴文否
正值檀郎耗斷時

呂氏

浙江餘姚縣人適張永淶著有旅夢集

華嶽和李夫人

誰從太白闢元冥
地曠空明夜較星
雲髻初開迎旭日

鐵船欲渡待春霆
晴嵐隱見紛遙蜃
天井紆回透集靈
曾記弱齡峯上過
蓮花池畔禮仙經

頤芳集卷之二十終

